

1 Korin

Pas mami Por ai Korinihündambo sürü papimarandi

1 ¹Ro Por-anahi God aiyu wambo Sisas Kraisindi hoafi semindi horambohünda kafaore hiniŋgi-mareandiri. ²Wandi wandafi Sostenes-dibo nimaremboanehi Kraisindi nendi Korin ngoafihü amarei siheimbo pas nda sürü paparihandi. God ai siheimbo Krais-dibo niŋgombohünda wandi yaŋgir-anei yahu hiniŋgi-mareandüri. Raniyu asu ai nindou muŋguambo sihefi Adükari Sisas Kraisimbo didibafiyei arihünda ranaheimbo ai-babidimbo niŋgombohünda kafaore hiniŋgi-mareandüri. Adükari ranai ana ahei asu sihefi muŋguamboani. ³Ape God asu sihefi Adükari Sisas Krais ai siheimbo moani hipoambo-ndineandürihi asu ŋgusüfoambe afurifembü hohoanimo mbisabina-ndüramboane.

Por ai Godimbo hihifarüri

⁴Sisas Kraisndi süŋguyu siheimbo God ai moani hipoambo-mareandüri ranimbo-hündambo-animbo asu ahambo siheimbohünda muŋguambo si hihifirihüni arihandi. ⁵⁻⁶Kraisindi hoafi ro siheimbo hoafimehundüri ranana sihei ŋgusüfoambe ŋginindi nimarindürimboane. Se Krais-babidi aniboadei rani-süŋgu God ai ahandi hoafi hoafiyorambo asu ahambo fifirifembo moatükuni ra siheimbo masagadüri. ⁷Ranimboanehi asu se sihefi Adükari Sisas Krais ai weindahi tüküfemboayu ranahambo himboyeihi asu se-ana moai Yifiafi Aboedindi-mayo moatükuni ra mbonimbo-rihümündi, ŋga wani. ⁸Asu ai siheimbo ŋginindi kikihi-ndamündündüri nüŋgu ŋgumbo bidifirani si asu ai kosimbo tüküfiyuambe ŋgiri se hütiyei mbüsu. ⁹Asu ai nini-moatükuni hoafayu ai randeambui. Ahandi nimori Sisas Krais sihefi Adükari-babidi wudimbeyeia yahuhayamboyu ai siheimbo mborai mehündüri.

Kraisindi nendi ai yikürübümehindi

¹⁰ Wandafi mami, sihefi Adükari Sisas Kraisindi süngu siheimbo hüti hoafayahandüri. Muñguambo se mami hohoanimó rani yangiranimbo hohoanimondei. Ijga asu se yikürübündeí wakindiñimboyei. Se moani mami hohoanimó süngu-animbo moani mamimbondahi nimboei. ¹¹ Wandafi mami, nindou bidifiri Kroendi worambeahindi ai hoafimehündüri sihei mbusümo simbori hoafi hohoanimó engoro ranahambo. ¹² Awi ro ndarihe hoafayahi: Nindou mamami se rani-poanimbo rani-poanimbo hoafiyo hoafimayei. Ijgorü ai hoafiyohü yahoya, “Roana Porindi süngueheandi,” ñgorü ai, “Roana Aporosindi süngueheandi,” ñgorü ai, “Roana Pitandi süngueheandi,” asu ñgorü ai, “Roana Kraisindi süngueheandi,” rani hoafi hoafimayei. ¹³ Asu Sisas Krais ai yikürübü-reandeimbiyu? Asu Por ai siheimbo-hündambo nimi keimbi karihendeimbifihí yifiyuwai? Porindi süngurihoririhündeimbimboyahi hundüriyei-ai? ¹⁴ Ro moai siheimbo ana dabo hundürihandüri, ñga Krispus asu Gaius ahafanimbo yangirihapiri hundüri-marihapiri. Ranimbo-hündamboanahi ro Godimbo hihifarihüni. ¹⁵ Ranimbo-hündambo-animbo nindou mami ai ñgiri wandi ndürinambo himoni hundürimayei mbüsü haya hoafindu, ñga wani. ¹⁶ Awi yini, ro Stefanosiyu asu ahandi fikiminindi aheimbo amboani hundüri-marihandüri, ñga nindou amurambo hundüri-yondürimbo ana, moai hohoanimoyahi. ¹⁷ Sisas Krais ai wambo moai nindou hundüri-yondürimbo koarihendiri, ñga aboedi hoafi ra bokarihéfembo-hündamboyo koarihendiri. Ijga roana, fifirundeimbi nindou tikai hoafiyomo arundi nahurai rani hoafi moai hoafiya rihandi. Ranimbe- mbonana asu Sisas Krais nimi keimbi karihendeimbi-fihí yifimayu ranai ñginindimbeyu-poani.

Krais ana Godindi ñginind-ani

¹⁸ Sisas Krais nimi keimbi karihendeimbifihí yifimayu hoafi ranana nindou moaruwaimbo-femboayei ranaheimbo hihindi hohoanimó-anendüri, ñga asu nindou God ai aboedambo-reamuneimbi sihefimbo ana rani hoafi ra Godindi ñginind-anemuni. ¹⁹ Bukambe yare hoafiyowohü yahoya, “Hifinindi ndorihí hohoanimoyeimbi-yei ndofe hohoanimó ranana moaruwaimbo-ndiheandühi asu nindou hifinindi aboedi hohoanimó-yomondeimbi-yafe hohoanimó ra gígiranambo-ndiheamboyahi,” meho. ²⁰ Refe-anasi asu nahi ndoru hohoanimoyomo-rundeimbi maningomoa? Asu ahinümbi fifirundeimbi nindou amboani nahiyomo aningomoa? Asu nahiyomo hifi ndanihündambo simbori hoafi nafiru-rundeimbi aningomoa? Nindou hifi ndanihü animboei ranahei ndofe hohoanimó ranahambo God ai hihindi hohoanimó-ane yahu nafuimayu!

²¹ Godindi ndofe hohoanimo sünguyo hifi ndanihündambo nindou ndorihififirihindeimbi ai ahei hohoanimonambo yanggiri nggiri Godimbo fifirindihori. Hoafi ro hoafiyefi arihundi ra nindou ranahambo hihindi hohoanimo-ane asei, nga God ai yifiriyu haya nindou Kraismbo anihondümbo-arihori ranaheimbo aboedambo-ndiheandüri-mboyahi, mehu. ²² Hoafi ranahambo anihond-ane yahombohünda Suda ai hepünifeimbi moatükuni ranimboanemo hoeindihu ehomo, nga asu Grik ai fifirife hohoanimo ranimboanemo yifirayomo. ²³ Nga sihefimbo ana Sisas Krai nimi keimbi karihendeimbifihifimayü ranahamboane ro bokarihuhu arihundi. Rani hoafi ranane Suda-yomondi hohoanimo ranahambo mamikarapuri arandi. Asu Grik ana ndani hoafi ndanahamboya rani-moatükuni ana hihindi hohoanimo-ane yahomo houmbo hohoanimo-yomondühanemo. ²⁴ Nga asu sibir-anehi, Sudahünd-anehi asu Grikihünd-anehi münguambo sihefimbo God ai mborai mehumuni ra himboriyefimbü sihefimbo ana Krai ai Godindi ngginindi moatükuniyu haya, asu ahandi ndofe hohoanimo-ani. ²⁵ God ai hihindi hohoanimombayumbonana, ahandi hohoanimo ra nindou-yei ndofe hohoanimo nggasünde. Asu God ai kehurimbeyu-mbonana, ahandi kehuri ra nindou-yei ngginindi nggasünde.

²⁶ Wandafi mami, se ndandihif hohoanimondei sapo horombo siheimbo God ai hoafimayundüra ahandi nindou tükümehindi ranimbo. Sihei mbusümo nindou afindi ai hifinindi hohoanimo fifirihindeimbi-yeipoani. Nindou afindi ai ngginindi-yeipoani. Nindou afindi ai adükari ndürimbi-yeipoani. ²⁷ Nga asu hifi ndanihündambo nindou ai hohoanimoyehi hihindi hohoanimoyeimb-anehi masei ranaheimbo God ai moani hohoanimoyu haya masemündündüri ndorihif hohoanimoye-rihündeimbi nindou aheimbo amoaningambo-fendürimbohünda. Asu hifi ndanihündambo nindou ai ra ngginindikoate-yeimb-ane masei ranaheimbo God ai hohoanimoyu haya masemündündüri nindou ngginindi hifandi-rihündeimbi aheimbo amoaningambo-fendürimbohünda. ²⁸ Raniyu asu ai hifi ndanihü ndürikoate-yoweimbi moatükuni raniyo, asu nindou ai rani-moatükuni ana moanane seihü yiboaruko-marihindi ra God ai masemüdu nindou ai aboedi hamind-ane masei ranahambo hifinambo-fembohünda. ²⁹ Rani-mayowamboane nindou mami ai nggiri Godindi himboahü ahandihoarimbo borindu. ³⁰ Nga God ai siheimbo Sisas Krai-babidi hiningimarear-anehi. God ai ahambo sihefi fifirife hohoanimo, Godindi himboahü mbumundi ninggo hohoanimo, sürühoeimbi hohoanimo süngufembo hohoanimo, asu aboedambo-femunimbo hohoanimo ranahambo nimindimboriri hiningimariri. ³¹ Ranimboane Godindi hoafi ai hoafiyohü yahoya, “Nindou ai borimboayu ana, ai Adükarimbo yanggir-animbo borimbiyuwamboane,” meho.

Por ai Sisas yifimayu ranahambo hoafimayu

2 ¹ Wandafi mami, sapo siheimbo sowana sühühühi Godindi-mayo dibohindi hoafi hoafiyahühi ro moai ndorihoeimbi hamindi hoafi

nahurai hoafiyahi asu moai hohoanimo ndoriheandeimb-anahi sahehea hoafiyahi. ²Ro se-babidi nimboambo ana rarihe hohoanimoyahühiya, ngiri ngorü-moatükunimbo yamundiheandi, nga Sisasimbo asu ai nimi keimbi karihendeimbifihi yifimayu ranahambo yanggir-animbo yamundiheamboya, masahi. ³Ro siheimbo-so nimboahambe hamindi kemindikoate-yahühi hihamindari kapeihiyahi manimboahi. ⁴Ro yamundiheandühi asu bokari-mariheheandi ra fifirundeimbi nindou-yomondi-mayo fifirife hoafinambo-yopoani hoafimayahi. Nga ro hoafiyahane Godindi Yifiafandi nginindinambo ratüpurimayahi ranai wandi hoafi anihond-ane yaho nafuimeyondüri. ⁵Sihei anihondümbofe ra se nindou-yei fifirife hohoanimonambo tüküfembo moeisahi, nga Godindi nginindinambo-animbo tükümbifeyo-wamboane.

Godindi ndofe hohoanimo

⁶Nga nindou nginindimbo-yahindeimbi aheimboane ro ndofe hohoanimo hoafi ra hoafiyahandüri arihandisi, nga ndofe hohoanimo ranana hifi ndanihündambo-yopoani asu hifi ndanihündi bogoriyafemayopoani. Nga ahei nginindi afure arandi. ⁷Godindi ndofe hohoanimo-ane yamundihe arihandi. Hohoanimo ranana dibo mengoro-ane. God ai mungu-moatükuni nafikoate-yuambeyo ai rani ndofe hohoanimo ranahambo sihefimbo ai ndürümbi mbimariamboane yahuhaya ahandi hohoanimonambo yanggiri hoafiyu masihendi. ⁸Hifi ndanihündambo nindou bogori mami ai-amboani ndofe hohoanimo ra moai fifireandi. Asu ai fifirimbaru-mbonana ngiri nindou Adükari himboamupuimbo-randeimbi-mayu ra sowaründümo houmbo nimi keimbi karihendeimbi-fihi parüwuri, nga wani. ⁹Nga Bukambe yare hoafiyowohü yahoya,

“Nindou Godimbo hohoanimo parihori-rihoreimbi ranaheimbo ai afindi moatükuni didiboadore masihendi.

Rani-moatükuni ra himboari ai moai hoeireandi,

himboambe ai moai himboriyo

asu nindou-yafe hohoanimonambo yanggiri moai tüküfeyo,”

Aisaia 64:4

meho. ¹⁰Hoafi ra ai dibo mengoroyosi, nga Yifiafi Aboedi ranahandi ratüpurinamboyo God ai rani-moatükuni ra nafuimemuni. Yifiafi Aboedi ranai ana Godindi hohoanimo dibo engoro amboani kokondambo hoeindeamboe. ¹¹Nindou ngorü ai ngiri ngoründi hohoanimo amaro ra fifirindeandi, nga yifiafi ahandi fiambe amarondo ranai-animbo ahandihoari fifirindeamboe. Mare yahuraiane nindou ai moai God hohoanimoayu ra fifirihindi, nga ahandi Yifiafi Aboedi ranane ahandi hohoanimo ra fifireamboayo. ¹²Sihiri ana hifi ndanihündambo yifiafi ranana moai sahumindefi, nga Yifiafi God ai koamarihemuni

raniyo masahumindëfi. Sapo God ai nine-moatükuni masemuni ra fifiriferambohünda. ¹³Ranimboane sihiri ngiri hoafindefühi nindou-yafe hohoanimo hoafinambo yamundihundi, nga Yifiafi Aboedindi yamundife hoafi rananimbo nindou Godindi Yifiafi ahei fiambe nimarindüreimbi ranaheimbo Godindi moatükuni fifirife hoafimboane.

¹⁴Ngga nindou Yifiafi ahandi fiambe nimarikoate-yondoweimbi ranai ngiri Godindi Yifiafi sai-randeimbi moatükuni ra ndemüdu. Nindou aiana rani-moatükuni ra ngiri ndonde fifirindeandi. Ngga ahambo hihindi hohoanimo nahuraindimboe. Ngga Yifiafindi wari-süngu yanggir-animbo nindou ai rani-moatükuni yibobondeandühi fifirindeambui. ¹⁵Nindou düdi ai Yifiafi Aboedi ra ahandi fiambe amarondo ana, ai munguambo moatükuni yibobondeambui, nga asu nindou ngorü ai ngiri ahandi hohoanimo yibobondeandi. ¹⁶Godindi hoafi yare hoafiyowohü yahoya, “Nindou düdi Adükarindi hohoanimo ffireamboayu-a? Nindou didai ahambo yamundimandira?” Ngga sihefimbo ana awi Kraisindi hohoanimo ra ngusüfoambe nimarimunimboane.

**Kraisindi nendiyafe ratüpuriyu-randeimbi ana
Godindi ratüpuriyu-randeimbani**

3 ¹Wandafi mamï, horombo ana ro ngiri siheimbo Yifiafi Aboedi nimarindüreimbimbo hoafiyahandüri arihandi nou hoafiyahandüri. Ro nindou ai hifi ndanihündambo hohoanimoyeimbi asu nimoakidibou nahurai siheimbo hoafimehandüri. ²Awi ro siheimbo kehuri sesi safiyo moangui-marïhandüri, nga nimboe sapo se moai nginindi sesi sesimbo tüküyahindi hapondani amboani. ³Ngga hapondani ana awi se nindou hifi ndanihünda animboei nahurai-anei. Wandafi nggorümbo moaruwaimbofi hohoanimo asu siheihöari simbori hoafi ranana awi sihei mbusümo yanggoromboane. Hohoanimo ranana nindou hifi ndanihündambo hohoanimo asu wamindafi hohoanimo ranane hifandarihündi. ⁴Nindou mamï ai hoafiyuhüya, “Roana Porindi süngueheandi.” Asu ngorü ai hoafiyuhüya, “Roana Aporosindi süngueheandi.” Rani hohoanimo se hohoanimoayei ranana nindou hifi ndani-hündamboyafe hohoanimo-ane hohoanimoayei.

⁵Se ranahambo ndondïhi hohoanimondei. Aporos ra nindou düdia? Asu ro Por nda ro didiyaha? Roana moani Godindi ratüpuriyo yanggiri nindou-anehi. God ai yihoefimbo ratüpuri masemun-ane asu yihoefi ratüpuri rani-sünguyei se Sisas Kraisimbo anihondümbo-marïhori. ⁶Ro nümbürï mamï ranambe hoari hifi-kamarïheandi. Asu Aporos ai wohimarïhendï. Ngga asu Ape God aiyu rani-moatükuni ranahambo botimareanda adükari tüküme Feyo. ⁷Ranimboane nindou ai nini manggiriyo hifi-karareand-ane asu woharihendi ranai ana ndürimbiyupoani, nga wani. Ngga sapo God ai rani-moatükuni ranahambo

botireandani tükefeyo ranai yanggir-ani ndürümbi hamindayu. ⁸Ŋga nindou düdi maŋgiri hifikare asu nindou düdi wohirihai arandi rani yimbu ai moani simogodi nindou-anafani. Ŋga nindou ranahafanimbo God ai ahandihoar-animbo sünguna nine ratüpuri ai ratüpurimefani takini dagapirimbui. ⁹Roana mamimboyaho hohoa Godindi ratüpuri ratüpurayehi, Ŋga seana Godindi nümbüri, asu wori nahurai-anei.

**Godindi ratüpuriyei-rihündeimb ai wori
worimboru-rundeimbi nahurai-anei**

¹⁰Godindi moani hipoambofe-namboyahi ro nindou aboedi worimbora-randeimbi nou tükümeheandi. Raniyahi asu ro kambohoani boatei ŋginindi mafeburaheandi. Raniyo asu nindou ŋgorü ai kambohoani raniwami wori mafondeandi. Ŋga nindou mamami düdi worimboarandi ranai moani ndonde hoeindeandühi wori ra worimbondandi. ¹¹God ai mbusümo kambohoani hondü ŋginindi mafondiri ra Sisas Kraisi-ani, Ŋga asu kambohoani ŋgiri asükai nindou ai yahurai fondeandi. ¹²Nindou bidifiri ai gor, sirfa, nimoei kaki afindi fihikoarifehemo ranimbo raniwami worimbo-ndühümboyei. Ŋga asu nindou bidifiri ai nimi, wohi asu ahurindambo nimindi raninambo worimbo-ndühümboyei. ¹³Ranimbo nindou ai nine-moatükuni nüŋgunahuraiyo ratüpuriyei hiniŋgimarihindi ra Kraisi tüküfi simboani weindahi tükündifemboe. Asu rani si weindahi tüküfe simboan-animbo God ai hai nahurai ahei ratüpuri ra rande hoeinde-andürimbui. Ranimbo ai nahaniyo aboedi safayo ranahambo hoeindeambui. ¹⁴Asu nindou ai kambohoani raniwami worimbo-rihündani asu wori ahei ranai hai tikirikoate-ayo ana, nindou ranai takini ndahümündimboyei. ¹⁵Ŋga asu nindou ahei ratüpurimayei ra hai tikirarandi ana, asu ai ranahandi takini ŋgiri ndahümündi. Ŋga asu aheihari ana haiambeahindi hürarihehindi nouehindi ana, aboedambo-ndahimboyei.

Sihiri Godindi wor-aneifi

¹⁶Se fifirihindai, seana Godindi wor-anei, Ŋga asu ranane Godindi Yifiafi ranai sihei mbusümo amaro. ¹⁷Ŋga asu nindou düdi ai Godindi wori ra moaruwaimbo-areandi ana, asu simbori God ai nindou ranahambo moaruwaimbo-ndirümbui. Godindi wori ana ahandi yanggir-ane asu seana ahandi wor-anei.

Sihiri ŋgiri nindoumbo adükar-anei mbisefi

¹⁸Se sihei fimbo tikai hoafindeimboyei. Sihei mbusümo nindou mamami ai hifi ndanihündambo hohoanimo süngurandühi yare hohoanimoyuhüya, “Roana fifiriheandeimb-anahi,” ehu ana, nindou ranai awi nindou-yei himboahü hihindi hohoanimoyu-randeimbi nahurai

tükümbifi-yuwamboane. Ranimbo asu ai Godindi hohoanimoambe fífíreandeimbi nindou hondü tükündifimbui. ¹⁹Hifi ndanihündambo aboedi fífirife ranana Godindi himboahü hihindi hohoanimo nahurai-ane. Godindi hoafi yare hoafiyowohü yahoya,

“Fífirundeimbi nindou ai wosihoafori hoafiyomo arundi,
nga God ai ahamundi hohoanimo moaruwaimbo-ndeapürimbui,”

Job 5:13

meho. ²⁰Ŋga Godindi hoafi asukai yare hoafiyowohü yahoya,

“Adükari ai fífíreamboani fífirundeimbi nindou-yomondi hohoanimo ranana
nimindi aboedi fífirifekoate-ane,”

Buk Song 94:11

meho.

²¹⁻²²Se ŋgiri ŋgorü nindou ranimbo borindei, ŋga Por, Aporos asu Pita muŋguambo ra siheimbo fehefembo awi sihei-anemo. Yini, ŋga muŋguambo moatükuni siheimbo fehefembo sihei-ane. Hifi, yaŋgiri niŋgo, yifi, hapondan-ane asu süngunamboane muŋgu-moatükuni ra sihei-ane. ²³Asu se Kraisind-anei asu Krai ai Godind-ani.

Adükari ai ahandihoar-ani ahandi ratüpuriyomorundeimbi ahamumbo fífíreapuri arandi

4 ¹Se yihoefimbo rahurai hohoanimondei: Ai Kraisindi ratüpurimbo nindou-anemo. Ai Godindi hoafi dibo meŋgoro ranahandi hifandirurundeimb-anemo. ²Ŋga nindou hifandimboayu ahandi ratüpurimbo hohoanimo ana ndahurai-ane. Ai nine ratüpuri hifandimboayu ana, ai ndore aboedi hifandi-mbirandamboane. ³Se-anei asu nindou hifihüdi hohoanimo süngurihindeimbi ai wandi hohoanimo ranahambo yiboboareandi ana, ra moanane asahi, ŋga asu ro moai wandihoari rarihe yiboborihe rihandi. ⁴Ro moai nini-moatükuni moaruwai ramariheandi ra hohoanimoyahi, ŋga asu ŋgiri ro wandihoari randihe hoafindahühiya, “Roana nindou mbumundi hamind-anahi mbisahi, ŋga wani.” Wandi ratüpuri yibobofe ra Adükari yaŋgir-animbo randeambui. ⁵Ranimboane asu rani si ra awi tüküfekoate-yoambe ana, se nindou ŋgorüdi hohoanimo yibobofendüripoani, ŋga Adükar-animbo kusü simboani yibobondearimbui. Ai-animbo muŋgu-moatükuni dibo eŋgoro ra ndemündü si niŋgoani digembui. Ranimbo asu ai muŋguambo nindou-yafe ŋgusüfoambe hohoanimo ra weindahindeambui. Rani-simboani animbo God ai nindou mamami ahei hohoanimo ranahambo aboed-ane mbüsümbui.

⁶Wandafi mami, ro siheimbo farihefe-ndürimbo hohoanimoyahüh-anahi asu Aporos-dibo yihoehi fimbo muŋgu hoafi ranahambo hoafayahi. Se yihoehimbo hohoanimo-ndühimunüh-animbo asu mbumundi hohoanimo rani yaŋgiri süngundihihindi hoafi mami hoafimayo nou

“Godindi bukambe hoafimayo ra wudipoapondihi süngundihündi,” meho. Ranimboane asu se nindou ngorümbo hihifi-hihifindeihi asu ngorümbo moaruwaimbo-ndihorimboyei. ⁷Wandafi mami, moai nindou ngorü sihambo ngoründi himboahü adükarimbore hiniᅅgireandüri. Asu se nini-moatükuni Godindi-mayo semindikoate-mayeia? Asu se Godindi-mayo yanᅅgiri nine-moatükuni asahümündi ana, asu nimboe se rani-moatükuni ra siheihoari nimindihanefi sei hei siheihoarimbo borayeia?

⁸Se rarihi hohoanimoyeihi seiya, “Roana ndeara muᅅguambo moatükuni nafirihumi-ndefomboanefi. Roana Godindi-mayo aboedi-moatükuni sahumindefi hohu afindeimbanefi. Roana ndeara adükari bogorimboyahu tüküyahumboanefi,” maseisi, nga roana adükari bogorikoate-anehi. Seana anihondümbo adükari bogorimbondahi niboadei animbo asu ro se-babidi bogorimbondahu nimboefomboanefi. ⁹Ro rarihe hohoanimoyahi, Kraisindi hoafi sahumindefi hefirihundeimbi yihoefimbo ana God ai hifini hondü hiniᅅgimareamuni. Roana kotambe papi-hoafiyomuni mburimbo hifokoeffemuna sünambeahindi nendi asu nindou-yei himboahü yifimbo nahurai-anehi. ¹⁰Kraisimbo farihefemböhünda ro hihindi hohoanimoyefeimbi nahurai-anehi, nga se rarihi hohoanimoyeihiya, “Ro Kraisindi hohoanimoyefeimbi nindou hondü tüküyahumboanefi,” maseisi. Roana nᅅinindiyefipoani, nga seana nᅅinindi saf-anei. Seana nindou ndürimbanei, nga roana nindou yihoefimbo moaruwaimbo-rihimuneimb-anehi. ¹¹Horombo piyo haya ho-hombo hapondani amboani ro wembomboyefühi amindasümo kikire yaparimarihemuni. Asu hoeari amboani wonimbi moaruwai magüdühündi. Ai yihoefimbo wari momondifekeate pakarighamuni marundi. Ro moai aboedi ndorihu nimarefi. ¹²Roana yihoefi warinambo ratüpuri ra tiᅅirifoyefi marihündi. Ai yihoefimbo tirifoefe hoafirihümunani asu roana aheimbo simbori aboedi hoafimehundüri. Ai yihoefimbo moaruwaimbo-rihimunani asu moanane sefühi nᅅinindi manimboefi. ¹³Ai yihoefimbo amoᅅgoni hoafiyahümunani asu ro simbori aheimbo hoafendühi hoafiyahundüri marihündi. Roana muᅅguambo nindou-yei himboahü yafisühumi nahurai-ayefi. Ro horombo piyefi hohu düdübudeimbi nahurai-ayefi.

Korinihündi ai Porindi hohoanimoyefeimbi ra süngumbirihind-amboane

¹⁴Se amoaniᅅgi-mbeyeiya saheheambo-yahipoani ro pas nda sürü paparihandi. Nga siheimbo didiboadondihearü samboanahi se wandi nᅅgüsüfoahündi nimori nou sürü nda paparihandi. ¹⁵Kraisindi hohoanimoyefeimbi süngumbo siheimbo 10,000 nindou hifandiyondürimbo animboeisi, nga afindi hamindi yahurai boagireimbi-yeipoani, nga wani. Ro Godindi hoafi aboedi ra hoafimeha himboriyeyi mburihü Krais-babidi animboeisi rani-süngumbo ro mam-anahi sihei ape nahurai-ayahi. ¹⁶Ranimboanahi

ro siheimbo hūti hoafayahandūri wandi-mayo hohoanimo nda sahūmūndi mburihū rani-sūngu mbihahabudia saheheambo. ¹⁷Ranisūngumboanahi haponda ro siheimbo sowana Timoti koamarihahina asūfu. Aiana Adūkarimbo sūngunambo wandi ŋgusūfoahūndi nimori nahurai aboedi ratūpuriyu-randeimb-ani. Ai-animbo ro Kraisindi simbori hohoanimo sūngurihi asu ahandi nendi muŋguambo hifihū yamundihe arihandi ra siheimbo asūkai hohoanimo botindearūmbui.

¹⁸Awi bidifiri aiana wamboya aiana ŋgiri yihoefimbo sowana dūfu sei hehimboanei asu ai ahei fimbo boriyei wakirihi arihūndi. ¹⁹Ŋga asu God ai yifirayu ana, ro siheimbo sowana nimai tūkūndaheamboya. Asu rananimbo nindou ahei fimbo boriyeimbi-yei ŋginindi ra ro tūrūboadihe fifirindi-heamboya. Ŋga ahei hoafi ranana moanane. ²⁰God ai ŋginindi hifandarandi ranana hoafi yaŋgiriyoopani, ŋga wani. Ŋga ŋginindi moatūkuni saf-ane. ²¹Ŋga se nini hohoanimomboyeyi hohoanimoayeia? Asu se sihei hohoanimo ra didiboadofekoate-yeiyani ro nimihari semindi hefembo siheimbo didiboado-fendūrimboyo hohoanimoayeia? Asu se sihei hohoanimo ra didiboado-ndihindani ro siheimbo himboari hoafendūhi hipoambofe hohoanimo semindi hefembo siheimbo sowana sifombo ranimboyeyi hohoanimoayeia?

Nimorehi sisihimo hohoanimo Korin ŋgoafihū engoro

5 ¹Sihei mbusūmo ana nimorehi sisihimo hohoanimo hoafi ranane yaŋgori wakareandi. Rani-moatūkuni ra moai nindou Godindi hoafi sūngufekoate ana rarihi rihūndi. Nindou mami ai afindandi nimorehi hūramūndū marandi hoafi nahurai himborimayahi! ²Asu awi se sihei fimboanei borayeyi. Ŋga awi se afindi hohoanimondeihi aranindei. Asu sapo nindou dūdi ai sihei mbusūmo moaruwai rani hohoanimomayu ranahambo siheiambeahindi hūndihorimindei himboranambo-ndihori. ³Roana wandi fi-ane aŋgunayahi, ŋga wandi hohoanimo ana se-babidimboane engoro. Sihefi Adūkari Sisas Kraisindi ndūrinambo ro sapo nindou sihei mbusūmo moaruwai hohoanimomayu ranahambo papirihinūhi tinjirifo asahando mami ranihū se-babidimbo nimboambo hoeiriheambo nou. ⁴Awi se mami fandihindan-animbo asu ro hohoanimonambo se babidi fandihundani sihefi Adūkari Sisasindi ŋginindi ranambo ai akimi sihiri-babidi nūngumbui. ⁵Ranimbo asu se nindou ranahambo Satanindi warihūndihori ahandi moaruwai hohoanimo rani-sūnguna ahandi fi ranai moaruwaimbo-ndifimbuisi, ŋga yifiafi ranai Adūkarindi si tūkūfe simboani aboedambo-mbifeyowamboane.

Korin ai nindou moaruwai ranahambo yihirimbiri-horamboane

⁶Awi se borayeyi habudi ranana aboedi hamindi hohoanimoyopoani! Se fifirihindi hoafi nda, “yis akidou praua ambe parefeyo ana, bret

munguambo ra fufudigondimboe.”⁷ Ranimbo-hündambo-animbo asu se moaruwai hohoanimo yis wamindafi nahurai ra fifirindihümündi pindihindan-animbo asu se bret simbori nou aboedi hamindi tükündahimboyei. Sapo aboedambo-femunimbo sipsip nimori Krai ra hifokoarüwuri sihawurimboanemo asu sihefi God aboedambo-femunimbo sesesimbo si tüküme feyo.⁸ Ranimbo-hündambo-animbo sihiri rani aboedambofembo si ranahambo hihifi-hihifimbohündambo didiboado-ndihumboane. Sihiri moaruwai hohoanimo raguanambo-ndihumboane Suda ai yis wamindafi pimarihindi nou. Sihiri yisikoate bret nahurai tükündahumboyefi sapo ra ai anihondümbo hoafimbo asu didiboadofe ratüpurimbo nou-ane.

⁹Horombo ro pas sürü papirihü koariheheandühi sahiya, “Se nindou nimorehi sisihimoyei-rihündeimbi babidi fiyimbu-ndeimboyei,” masahandüri.¹⁰ Nindou munguambo hifi ndanihünda ai nimorehi sisihimoyomo-rundeimbi, hohoanü-rihindeimbi, hühmbühüniyei-rihündeimbi asu tikai godimbo hohoanimoyei-rihündeimbi, ranaheimbo munguambo hiniñgife-ndürimboyopoani hoafimayahi, ñga wani. Asu se nindou hifi ndanihündambo rahurai hiniñgifendürimbo hohoanimondeihü ana, hifi ndan-amboani hiniñgindihindi.¹¹ Ñga roana ranahandambo nimindi hoafi sürü papirihandühi hoafimayahi ana, ndani hoafi ndanahamboyahi hoafimayahi: Nindou mami ranahambo se anihondümbore-randeimbi wandafi sahündoweimbi ai nimorehi sisihimoyu arand-ane, hohoanü-rihindeimbi, tikai godimbo hohoanimoyu arand-ane, tirifoefe hoafiyu arand-ane, asu bia sümündi haya mamikari hohoanimoyu arand-ane, se ai-babidi fiyimbu-ndeimboyei. Ñga ai-babidi nimari sesi sesimbo amboani kapeihiyahi yowani masahi.¹² Ai nünju-nahuraiyo rani hohoanimo rana? Nindou düdi ai Godindi nindou-yei mbusümo niñgokoate himborani amaru ranahandi hohoanimo yibobofe ra wandi ratüpurimbaiyo? Ai ra wani. Ñga nindou didiyei sihei mbusümo aniboadei ranahei hohoanimo yibobombirihü-ndamboane.¹³ Nindou himborani amarei ahei hohoanimo ana God ai yanggir-animbo yibobondea-ndürimbui. Ñga Godindi hoafi hoafiyohü yahoya, “Se-ana nindou moaruwai sihei mbusümo anünju ranahambo yihirindihori,” meho.

Kraisindi nindou ana wandafi ñgorümbo anihondümbofe-koateyeimbi-yei himboahü papi-hoafiyupoani

6 ¹Asu Kraisndi nindou seambeahindi mami ahambo hoafi engoro ana, nindou ranai ñgiri Godindi nindou seambeahindi fükakiboendüri haya ñgu nindou Godimbo fifirifekeate-aye ahei himboahü hoafi ahandi ra didiboadondeandi.² Godindi nindou sihiri süngunambo nindou hifi ndanihü-ndamboyei hohoanimo

yibobofendürimboayefi ranahambo awi se moai fifirihindiyo? Anihond-ane, sapo se nindou hifi ndanindhündambo ahei hohoanimó yibobofembomayei ana, moani akidou hoafi yahurai tüküfeyoani nimboe asu ra yibobofehü fifirifekoate-mayeia? ³ Asu sünambeahindi nendi-yomondi hohoanimó sünguna sihiri yibobofemboayefi ra awi se moai fifirihindiyo? Asu ra adükar-ane, nga ranimbo-hündambo animbo haponda ndarihu nimboefambe akidou ndahurai moatükuni ra yibobondihumboane. ⁴ Asu akidou yahurai moatükuni tükündifeyoani nindou Godindi hoafi süngufekoate-mayei aheimbo sowana hoafi ra nimboe sahümündi aheia? ⁵ Seana amoaningikoate-anei, nga anihond-ane nda, sihei mbusümo sihei wandafi mami ai fifireandeimbi mbanüngu niniyafani Kristen apodoho ranai simbori hoafiyafandani didiboado-fepirimbohünda. ⁶ Asu ngorü Kristen ai ngorümbo papi-hoafimbo nindou Godindi hoafi süngufekoate-mayei aheimbo sowana nindou ranai ahandi hoafi ra didiboado-fembohünda hu-marandi. ⁷ Se sihei wandafi ngorü ranahambo papi-hoafirihorühi simbori hoafiyei arihünda ranana awi Kraisindi hohoanimó ana münguna hifina hanimboanei. Asu se nimboe aheimbo himboari yangiri hifandiyondüra siheimbo moaruwaimbo-fendürikoate-mayeia? Asu se nimboe aheimbo himboari yangiri hifandiyondürani sihei-mayo napo hümbühünikoate-mayeia? ⁸ Nga asu siheihoari-yei simbori hümbühüneyeihi simbori moaruwaimbo-firimayei, nga sihei Kristen wandaf-anei.

⁹⁻¹⁰ Anihondane, nga se ra fifirihindai, nindou moaruwai hamindayei ranai ana ngiri God nginindi hifandarandi ranambe ngei. Nindou didiyei ai nimorehi sisihimo hohoanimoyei, sanendi kabomombo didibafiyei, nimorehi nindowenihümbi simbori himindiyei, asu nindowenihi bogo fiyimbu simbori moaruwai hohoanimoyomo, hümbühüneyei, nindou ngoründa napo hohoanirihü, bia simindei hehi moaruwai mamikari hohoanimoyei, nindou ngorümbo tirifoefe hoafiyei asu nindou ngoründa-mayo napo fufurihümündi rarao-rihindeimbi nindou God nginindi hifandarandi ranambe ngiri ngei. ¹¹ Horombo ana nindou bidifiri se yahurai manimboei-anei. Nga Adükari Sisas Krais asu Yifiafi Aboedi ai sihei moaruwai hohoanimó ra popoi-mariheneandüra haponda se Godindi yangir-anei asu ahandi himboahü mbumund-anei.

Sihefi fi ana Godindi sürühoeimbi ratüpurimboane

¹² Nindou mami ai hoafinduhüya, “Roana moani ro hohoanimomayahi süngu nini-moatükuniyo refemboayahi ra randiheamboyahi,” mbüsümbui. Yini, nga refeana randowamboayafisi, nga müngu-moatükuni se refemboayafi ranana sihambo aboedi yangiriyopoani. Yini rani-moatükuni ra, ro hoafindahühiya, “Ro nini-moatükuni refemboayahi ra randiheamboyahisi, nga asu ro ngiri nini-moatükuni

wambo hifandindandiri,” asahi. ¹³Nindou ŋgorü ai afindi sesimbo hohoanimonduhüya, “Sesi ana bodombo-hündamboane, asu bodo ana sesimbo-hündamboane,” ehu. Yinisi, ŋga asu rani-moatükuni ana God ai bidifiranambo si tükündifeyoani yibobo moendi-ndeapirimbui. Nindou ranahandi fi ranana nimorehi sisihimo hohoanimo fi-yopoani, ŋga Adükärimbo ratüpurimbo fi yanggir-ane. Asu Adükäri ai fi ranahambo ratüpuriyuhü wudipoapore arandi. ¹⁴God ai Adükärimbo yifihündi botimariri ranimbo-hündambo-animbo asu sihefimbo amboani ahandi ŋginindinambo mare yahurai botindeamunimbui.

¹⁵Se fifirihindai, sapo sihei fi ranana Kraisindi fi bidifiri kameihane? Asu ro Kraisindi fi ra ndahamindi hehea nimorehimbo dibo ho hohoanimo ranambe ŋga madiheheyo? Ŋgirindo ranana! ¹⁶Nindou ahandi fi ra semündü haya hu nimorehimbo dibomborandühi ahandi fi ra nimorehi ranahandi fih parareandi ra awi se fifirifekoate wamboyei? Hoafi mami ranai Bukambe yare hoafiyowohü yahoya “Nindou yimbu ahafe fi ranai mami nahurai tükündifemboe,” meho. ¹⁷Ŋga ranimboane nindou düdi ai ahandi fi ra Adükäri fih parareandi ana, Adükäri hohoanimoambe mam-anafani. ¹⁸Nimorehi sisihimo hohoanimo ra se refepoani. Nindou ranai amuri moaruwai hohoanimoayu ranana ahandi fi ranifih pareandühiyupoani, ŋga nimorehi sisihimoayu ranana ahandihoari ahandi fi ra moaruwaimbo-reandühani. ¹⁹⁻²⁰Sihei fi ra Yifiafi Aboedindi wor-ayo ra awi se moai fifirihindiyo? Sapo God ai Yifiafi Aboedi masagadüri sihei fiambe amarondüri. Sihei fi ana sihei yanggiryopoani, ŋga Godind-ane, sapo ai siheimbo kaki adükäri nambo nahurai pemimayundüri. Ranimbo-hündambo-animbo sihei fi ranimbo nine-moatükuni refembo Godimbo ahinindei.

Nimorehi semindi hohoanimo hoafi

7 ¹Haponda ro pasambe hoafi sürü papimarihendi ranahambo didiboadondihe waporimbo-ndihandüri samboanahi. Nindou mami ai nimorehi semindikoate-ayu ana, ra aboedi saf-anesi. ²Ŋga sihei mbusümo nimorehi sisihimo asu nindowenihi birabiri hohoanimo adükäri engoro ranimbo-hündambo-animbo, mamami nindowenihi ai nimorehümbi yanggirimbiyomo-ndamboane. Asu nimorehi mamami ai amboani nindowenihi yanggirimbiyei-amboane. ³Nindowenihi ahandi fi ranana ahandi nimorehi ranahandi fi-ane, ŋga ranimbo-hündambo-animbo nindowenihi ai ahandi fi ra kikihemindipoani. Mare yahurai saf-ane nimorehindi fi amboani ahandi nindowenihi ranahand-ane, ŋga ranimbo-hündambo-animbo nimorehi ranai-amboani ahandi fi ra kikihemindipoani. ⁴Nimorehi aiana ahandi fi ra ahandihoari hifandamboyoani, ŋga wani. Ahandi nindowenihi ai-ani hifandamboayu. Mare yahurai-ani nindowenihi ai-amboani

ahandi fi ra ahandihoari hifandamboyoani, nga ahandi nimorehi ai-ane hifandamboayo. ⁵Se nimorehühi asu anamindühindafine hena, sihafehoari sihafe fi ra simbori dibokorüri-ndamboyafe. Yini, asu se sihafehoari fi ranahambo bodifohü kikihemindi mburümbo Godimbo didibafi-fembohünda hoafi firandife mburina, sihafe fi ra kikihirandife animbafefe ana, i ra aboed-ane. Nga asu sihafe fi ra süngunambo mamambe-ndineandi. Nga asu se sihafe fi ra ndofe hifandikoate-ndafeani asu Satan ai sihafembo rande hoeindeapirimui. ⁶Ndani hoafi ndanana moai ro siheimbo randihindi sahi, nga siheimbo fehéfembo se yifiraye ana, randihindi asahi. ⁷Nüngurühi ana nindou münguambo ro nou anamindühife asu nimorehühifekoate niboadei asahi, nga münguambo mamami God ai rani-poani rani-poani nginindi yimumareand-ane. Raniyo nindou ngorü ai ngorü-poanimbo moatükuni semündü nindou ngorü ai ngorü-poanimbo semündü marandi.

⁸Haponda yihoarifi hoarifi asu kai aheimbo hoafayahandüri: Ro rawehendi nou se-amboani moani rarihi animboei hei ana, aboed-ane. ⁹Nga asu se sihei hohoanimo ra ndofe hohoanimokoate fi sihei ra mamikar-arihündi ana, awi se nimorehühi asu anamindühindahindi. Se rawehindi ranana aboedi saf-ane. Se refekoate-aye ana, sihei hohoanimo ranai moaruwai ratüpuri hohoanimo ranimbo ngusüfo botindearümboe. ¹⁰Nimorehi nindowenihühi-yeimbi aheimboane ndani hoafi nda randihindi asahi ranana wandi hoafiyopoani, nga wani. Ranana Adükarindi hoaf-ane. Hoafi ra yahurai-ane: Nimorehi ai ahandi nindowenihi ranahambo yowani hiniñginderimboe. ¹¹Nimorehi ai randifeyowohü ana, ai moani nindowenihikoate niñgombondowohü asu ahandi nindowenihi ra sowana hihirife hombondowohü. Asu nindowenihi ai ahandi nimorehi ranahambo moei mbüsühi koandihembui, nga yowani.

¹²Nga nindou amuri ranaheimbo ana, royahi wandi hohoanimonambo yangiri rarihe hoafimayahi, nga Adükarindi hoafiyopoani. Nindou anihondümbo-reandeimbi mami ai nimorehümbayu ana, asu nimorehi ranai Godimbo anihondümbofe-koateayo ranai nindowenihi rani-dibo niñgombo hohoanimondoani ana, asu nindowenihi ranai ahambo moei mbüsühi hiniñgindeambui, nga yowani. ¹³Asu mare anihondümbo-reandeimbi nimorehi ai Godimbo anihondümbofi-koate nindou serimindoani, nindowenihi ranai nimorehi rani-dibo niñgombo hohoanimoayu ana, asu ahambo moei mbisowohü hiniñginderimboe, nga yowani. ¹⁴Se ranahambo ndondihi fifirindihindi, nindou düdi Godimbo anihondümbofekoate-yumbü, ai ahandi nimorehi Godimbo anihondümbo-reandeimbi-mayondi fihü ahandi fi ra parareandi ana, nindou ranai Godindi himboahü aboed-ani. Asu nimorehi Godimbo anihondümbofekoate-yoweimbi ai ho nindou Godimbo anihondümbo-

moani ratüpuriyu-randeimbi nüngumboani. ²³ God ai siheimbo kaki adükarinambo nahurai masemündündür-anei. Iḡga ranimbo-hündambo-animbo se ḡgiri nindowyafe hohoanimo süngundowandühi moani ratüpuriyafi-randeimbi nahuraindafi. ²⁴ Wandafi mamî, mamami se nine-moatükuni rarihinda God ai Krai sowana mborai ehu ana, se mamî rani hohoanimo yaḡgir-animbo randihindühi nimboei.

Hoarifambori asu kaisahoabedi ranahei hoafi

²⁵ Yihoarifi hoarifi ranaheimbo ro moai Adükarindi-mayo hoafi sahamindi heheambo-yahipoani, ḡga moani wandi hohoanimonambo yaḡgir-anahi ro ndarihe hoafayahi. God ai wambo hipoambo-reandirühi anihondümbo-reandiri haya ahandi ratüपुरi masendiri. ²⁶ Haponda tiḡirifo afindi engoro ranimbohünda nindow ai moani yahurai-poanimbo mbinüḡguwamboane. ²⁷ Se nimorehümbayafi ana, asu se nimorehi ranahambo moei mbisamboayafi. Awi asu se nimorehi semindikoate-ayafi ana, asu se nimorehimbo kokondamboayafi. ²⁸ Iḡga asu se nimorehi asowandifi ranana moaruwai hohoanimoyopoani. Nimorehi yihoarifi ranai ho nindowenihi aserimindo ana, rani-moatükuni ra ai moaruwai hohoanimoyowohü-yopoani. Iḡga nimorehi nindowenihi ranai nimorehühi nindowenihihi-yahindeimbi ana, hifi ndanihü tiḡirifo afindi ndahümündimboyei, ḡga ranimboanahi yahurai moatükuni ra siheimbo sowahi tüküfembo ro moei asahi.

²⁹ Wandafi mamî, ro ndahurai-anahi ndarihe hohoanimoyayahi. Adükarindi si ra hapondani gedühiyopoani aniḡgo. Awi hapoana hombo nindow nimorehümbi ai nimorehikoate anüḡgu nou yare yahurai mbünüḡguwamboane. ³⁰ Nindow düdi arani-araniyu-randeimbi, ai moani afindi hohoanimokoateyu-randeimbi manüḡgu nahurai-mbiyuwamboane. Nindow düdi hihifi-hihifiyu-randeimbi ai nindow hihifi-hihifikoateyu-randeimbi nahurai-mbiyuwamboane. Nindow düdi napo pemiyu-randeimbi ai nindow napokoateyu-randeim-mayu nahurai-mbiyuwamboane. ³¹ Asu nindow hifi ndanihündambo ratüपुरi ratüपुरiyei-rihündembi, ai ḡgiri hifi ndanihündambo ratüपुरi ranahambo yaḡgiri ḡgusüfo pandihindi. Hifi haponda ndare aniḡgo ra ḡgiri ndande gedühi hamindi niḡgo.

³² Se afindi hohoanimoyo wakife ranahamboanahi ro moei asahi. Anihondümbo-reandeimbi nimorehikoate hoarifi anüḡgu ana, ai Adükarindi ratüपुरi ranahamboani afindi hohoanimoyu arandi. Adükari ai ranahambo hihifi-hihifimbiyuwa yahuhaya. ³³ Iḡga asu nimorehühifimbi nindow ana hifi ndanihündambo moatükunimbo afindi hohoanimoyu arandi nimorehi ai ranahambo hihifi-hihifimbeyowa yahuhaya. ³⁴ Ranimboane asu hohoanimo ahandi ranai yimbumboareandi. Iḡga anihondümbo-reandeimbi nimorehi

nindowenihi-koate yihoarifi-mayo ranai ana hohoanimo ahandi ranai Adükarindi ratüपुरi hohoanimo ranifihi yanggiri-ane apeniŋgondo, ai ahandi fi asu yifiafi ra Adükarindi yanggiri mbiniŋgowa yahohaya. Ŋga asu nimorehi nindoweniheimbi ana, ai hifi ndanihündambo moatükuni ranahamboane hohoanimoyo arandi, ahandi nindowenihi ranahamboya ai hihifi-hihfimbuyuwa yahohaya. ³⁵Siheimbo ro rani hoafi ranahambo yowani sahandürihi-yahipoani, ŋga wani. Ro siheimbo fehendürimbo samboanahi hoafi ra hoafayahi. Asu rananimbo se mbumundi hohoanimo süngundihindühi Adükarindi ratüपुरi rani yanggiri randihindühi nimboeiani rananimbo, asu nini-moatükuni ranai ŋgiri siheimbo fondamindindüri ŋgo saheheamboanahi hoafayahi.

³⁶Ŋga nindou ranai nimorehi semindimbo diboniyahündo-weimbi, ranahambo ŋgusüfoambe hohoanimoayu ana, asu ai nimorehi ranahambo semindimbo afindi hohoanimoayu ana, ra moani sisikoate mbisemündu-wamboane. Rani hohoanimo ana moaruwai hohoanimoyopoani. ³⁷Ŋga asu rani hohoanimo ranahambo ahandi ŋgusüfoambe yanggiri hohoanimoyuhü, asu ahambo rani hohoanimo ra nimai botifeakoate-ndowohü, ahandi hohoanimo ranai ŋginindi nimarindowohü, nimorehi ra moani mbiniŋgo ehu ana, ra aboed-ane. ³⁸Nindou ranai sapo ahandi nimorehi dibonimaye ra asemündu ana, aboed-anesi, ŋga asu nindou düdi ai nimorehi moani dibon-aye ranahambo semindikoateayu ana, ra moani aboedi hamind-ane.

³⁹Nimorehi nindowenihibi ana nine-hohoanimo ai hohoanimomayo rani-süngu ŋgiri randeandi ahandi nindowenihi ai nünguambe ana. Ŋga nindowenihi ai yifinduan-animbo, ai nindowenihi ŋgorü semündimbo hohoanimoayo amboani ai rambifeyo-wamboane. Ŋga ai Adükarimbo anihondümboreimbi yanggiri-animbo nderimindo. ⁴⁰Asu ai moani yare aniŋgo ana, ai moani mare aboedi ranihü rande hihifi-hihifina niŋgomböe. Ranana moani wandi hohoanimo-ane. Ŋga ro rarihe hohoanimoyahühi Godindi Yifiafi ranai fiambe nimarimbo farihendiri arandi asahi.

Tikai godimbo ninihondi sihefeimbihündi sesimbo hoafi

8 ¹Haponda ro tikai godimbo sesi sihefeimbihündi ranahambo wataporimbondiha samboanahi. Bidifiri ai seiya, “Roana fifirihundeimb-ane fi,” asei. Yinisi, ŋga fifirife ranana afindi-afindümbi hohoanimo botireandühane, ŋga ŋgusüfo pefe hohoanimo ranane nindou ŋgorümbo ŋginiramindi arandi. ²Nindou ranai nine-moatükuni ra anihondü hamindi fifiriheandeimb-anahi ehu ana, awi nindou ranai muŋgu-moatükuni ra fifireandeimbi hamindiyupoani. ³Ŋga asu nindou didiyei ai Godimbo hohoanimoaye ana, asu God ai nindou ranaheimbo fifireandürimboani.

⁴Ŋga asu sapo ninihondi tikai godimbo sihefeimbihündi sesi ranahambo ana ro rarihe hoafayahi: Sihiri ranahambo ndorihu fifirihumboanefi, tikai god ranana anihondü hondüyopoani, Ŋga sisami yanggir-ane. Ŋga God hondü ana moani mami yanggiri hamind-ani anüngu ranahambo sihiri fifirihurimboanefi. ⁵⁻⁶Asu afindi moatükuni ranahambo hoafiyehiya “god” ase-ane, asu afindi moatükuni ranahambo “adükari” ase-ane. Muŋguambo rani-moatükuni god asu adükari ra nimoamo-ane hifin-ane ra anüngo ana, I ra ambemboane, Ŋga sihiri ana mami God yanggir-ani sihefi Ape anüngu. Aiana muŋguambo moatükuni ra nimindühani asu sihiri ana ahand-ane animboefi. Adükari aiana moani mami hamind-ani anüngu asu aiana Sisas Krais-ani. Ahandi sünguyo muŋguambo moatükuni ranai tükümeŋeyo. Asu ahandi sünguna sihiri amboani animboefi.

⁷Ŋga nindou bidifiri ana ranahandambo hohoanimo ra moai fifirihindi. Aiana tikai god horombodidi ranahambo süngumarihündi. Ranimboanei asu tikai godimbo ninihondi sihefeimbihündi ra anihondü hond-ane masei. Aiana türüfoarihi fifirihindühi-yeipoani. Ranane asu ai sesi sahusihü, ranahambo ahei ŋgusüfoambe moaruwai-aneŋ ase. ⁸Anihond-ane, Ŋga asu sesi aseso ra ŋgiri God sowana akimi ndemindindüri ŋgo. Sihiri sesi ra sesikoate-ayefi ana, ŋgiri Godindi himboahü moaruwai tükündahundi. Ŋga asu sihiri asahusifi ana, ŋgiri ahandi himboahü aboedi tükündahundi. ⁹Ŋga asu se rani-moatükuni ranahambo hibadihumbo. Se nine hohoanimo refemboayei ra randihindani, asu nindou düdi ai ahandi Godimbo anihondümbofe akidou safayo ranai hoeindihindaniwani, asu ai-amboa refembo hohoanimoayei ana, ai moaruwai hohoanimo-ndeimboeyi.

¹⁰Nindou fifiriwandeimbi se tikai godindi wori ranambe hafi nimarifimbo sesi sowasifani, nindou Godimbo akidou yanggiri anihondümbo-reandeimbi-mayu ranai hoeiareanini ana, asu ai tikai godimbo ninihondi sihefeimbihündi ra sesimbo hohoanimondümbui. ¹¹Rananimo asu sihafi hohoanimo ranai sihafi wandafi ahambohindambo kameihi Sisas Krais yifimayu, sapo akidou yanggiri anihondümbo-reandeimbi-mayu ranahambo moaruwaimbo-nderimboe! ¹²Rani süngumbo-animbo asu se sihafi wandafi ranahambo hohoanimo moaruwaimbo-rowandoani, ai ahandi ŋgusüfoambe nini-moatükuniyo aboediyo asu moaruwaiyo türüfoefe hohoanimo ra moaruwaimbo-arowandi. Ranimboane asu se Kraisimbo hohoanimo moaruwaimbo-marowando. ¹³Ranimboane asu nini sesi wandi wandafi ranahambo rarerani moaruwai hohoanimo asemündu ana, ro ŋgiri sesi ra asükainda dagadihi, wandi wandafi ai moaruwai hohoanimon-dümbuimbohünda.

Por amboani Kraisindi hoafi sowandümo homorundeimbi bidifiri nahurai-ani

9 ¹Ro nindou-yafe hohoanimo süngufekoate-anahi moani aboedi animboahi. Ro Kraisindi hoafi sahamindi ha-rihandeimbi

animboahi asu Sisas sihefi Adükari hoeimarihini. Ro Adükarindi ratüpuri ratüpurimayahi sünguyo muŋguambo seana anihondümbo-rihindeimbi tükümehindi. ²Asu wambo nindou bidifiri ai Godindi hoafi semündü hu-randeimbiyupoani masei. Ŋga se fifirihimboanei, wandi ratüpuri ranambo se anihondümbo-rihindeimbi tükümehindi ranina ro Adükarindi hoafi sahamindi ha-rihandeimb-anahi ranahambo nafuimayo.

³Nindou bidifiri ai wandi hohoanimo ra yiboborihinda rani hoafi ranane simbori hoafiyahandüri arihandi. ⁴Kraisindi hoafi sahumindefi hefi-rihundeimbi ro yihoefi ratüpuri ranimbohünda sesi, sesi asu hoe simindimbo, ra ahinümbiyo? ⁵Asu Adükarindi akihoandi-yomo, Pitayu bidifiri Kraisindi hoafi sowandümo homo-rundeimbi-yomo ai ramefundi nou anihondümbo-reandeimbi nimorehi-dibo hoafi semindi hoahoangombo ra ahinümbiyosi? ⁶Awi Barnabas-dibo ro yanggiri yihoefi fi farihefembo kaki semindi ratüpuri ratüpuriyoani, asu amuri Kraisindi hoafi sowandümo homo-rundeimbi ranai wanimboyosi? ⁷Nindou mami ai amimbofi anüŋgu ra ahandihoari sesi kokombo-mandifiyosi? Nindou ai nümbüri hifareandi ra ahandihoari sesi yimuŋgu-remindikoate-mandüyosi? Asu nindou ai burmakau moanguiarandi ra ahandihoari burmakau titi boboe ra simindikoate-mandüyosi?

⁸Roana nindou-yafe hohoanimo süŋgu yanggiryahipoani hoafayahi. Ŋga ahinümbi hohoanimo amboani yahurai hoafimayo. ⁹Ŋga Mosesindi ahinümbi hohoanimo ranambe sürü papirandühi yahoya, “Burmakau ai wit hipiri fifirigendani se yowani ahandi yafambe kikihemindipoani, bidifiri wit dedimboe yaho hefembo,” meho. Asu God ai burmakaumbo yanggiri hoafiyuwaisi? ¹⁰Ranana yihoefimboyu hoafimayu. Anihond-ane, Bukambe hoafimayo ra sihefimbo rambirihinda yahohayamboyo. Nindou ŋgorü ai nümbüri hifireandaniyo, asu ŋgorü ai yimuŋgu-ramünduanioyo, ranai sapo ahafandi ratüpurayafani ranimbohünda sesi ra bidifiri semindimbo hohoanimo-mbeyafandamboane. ¹¹Ro sihei mbusümo Yifafi Aboedindi-mayo hoari ra hifi kamarihundi, ranimbohünda se yihoefimbo fi farihefembo bidifiri sesi saimbo ra yowanmandiyosi? ¹²Sapo se nindou bidifirambo sihei-mayo napo semindimbo yini, asei ana, asu yihoefimbo amboani afindimbo yini, mbiseiamboane.

Ro sihei-mayo napo semindi ra nafi yanggorosi, ŋga ambe masefi. Ro semindikoate-mayefi ra, sapo Kraisindi aboedi hoafi ra nafi gifepoani, sefi hoahumboyefi. Ranimboane ro tiŋjirifo afindi sahumindefi arihundi, ŋga ranimbo moanane asefi. ¹³Se fifirihindai, nindou Godindi adükari worambe ratüpuriyomo arundi, ranai ranifihind-ane sesi sowandümo arundi. Nindou Godimbo ninihondi hifokoaru sihou-rundeimbi fondi raniwami ratüpuriyomo arundi, ranai sihefembo fondi raniwaminind-ane ninihondi bidifiri sowandümo arundi. Awi ra se moai fifirihindiyoy?

¹⁴Mami rani-sünguyo, Adükari ai yahuya, “Nindou aboedi hoafi wataporimbo-arundi ranai nindou wataporimbo-arundüri ahei-mayo bidifiri napo ahamundi fi fehedefembo mbisahüpur-amboane,” mehu.

¹⁵Ŋga ro moai rasüngurihundi. Asu hapondani amboani sihei-mayo napo semindimbo-yahipoani pas nda sürü paparihandi, Ŋga wani. Ro napo semindikoate ranahambo hihifi-hihifayahi, asu ŋgiri ŋgorü nindou ai ro hihifi-hihifayahi nafi ra gündeandi. Ai rambarea-mbonana, ro yifayahi ra aboed-ane. ¹⁶Ro Aboedi hoafi hoafindahühi ra ŋgiri wandi fimbo borindahühi roana aboedi hohoanimo sünguriheandeimb-anahi mbisahi, Ŋga wani. Sapo Aboedi hoafi hoafimbo ranana wandi ratüpuri wambo ro ŋgiri hiningindiheandi. Ro aboedi hoafi hoafikoate-yahi-mbonana, ro ŋgiri aboedi nimboahi. ¹⁷Ro wandi hohoanimo süngu ratüpurayahi ana, ranifihitakini ndahamindimboyahi. Ŋga Adükari ai wambo rani ratüpuri ra masendiramboanahi ro ratüpurayahi. ¹⁸Asu ro nini takini wandi ratüpuri ranimbohünda mandahamindiha? Ro takini semindimbo-mayahi aboedi hoafi hoafiya arihandi ranimbo-hündambo ranana moai nini-moatükuni sahamindihi. Nimorehi nindowenihimbo moani hoafimbo ranahambo takini nahurai-ane.

Por ai munguambo nindou-yei moani ratüpuriyu-randeimbimbofi manüngu

¹⁹Ro nindou ŋgorüdi moani ratüpuriya-rihandeimbi-yahipoanisi. Ŋga asu ro wandi hohoanimonambo Kraisindi nindou tüküfembohünda nindou afindi safi semindimbo ahei moani ratüpuriya-rihandeimbi nahurai animboahi. ²⁰Ranimboane ro Suda-dibo nimboambo ahei hohoanimo sünguariheandi, Suda aheimbo aboedambo-fendürimbohünda. Ahinümbi hohoanimo ra moai wambo hifandirandiri, Ŋga nindou-yei himboahü ahinümbi hohoanimo ra sünguriheandühi nou-ayahi ahinümbi hohoanimo süngurihindeimbi aheimbo aboedambo-fendürimbohünda. ²¹Asu Suda-yafe ndifo ahinümbi hohoanimo süngufekoate-ayei, ranaheimbo ro-amboani ahinümbi hohoanimo süngufekoate-ayahi aheimbo aboedambo-fendürimbohünda. Ŋga asu ro moai Godindi ahinümbi hohoanimo ana hiningiriheandi. Wani, Ŋga Kraisindi ahinümbi hohoanimo ana sünguri-heandühanahi. ²²Asu didiyei ŋginindi anihondümbofekoate-ayei, ranaheimbo semindi-ndürimbohünda ro-amboani ŋginindi anihondümbo-fekoate nahurai-ayahi. Ro nindou bidifiri aboedambo-fendürimbohünda nafi kokombo munguambo nindou-yei hohoanimo süngurihe arihandi. ²³Ro rani ratüpuri ra rarihe marihandi, Sisasindi aboedi hoafi ra ŋginindi tükümbifeyowa sahehea. Rananimbo ro-amboani Adükari ai aboedi hoafindi aboedi moatükuni nindou ranaheimbo saimbo napire masihendi ra ndahamindi sahehea.

Sihiri napo semindimbo pipindefomboane

²⁴Sapo se fifirihindi napo semindimbo pipi ranambe munguambo nindou pipiyehanei, Ŋga mami yanggir-animbo pipi ranahandi napo ra

ndemündumbui. Iᅇga ranimboane se-amboani napo semindimbo pipi ra tiᅇirifondei. ²⁵Munᅇuambo nindou pipi ranambe napo semindimboayeie ana, ahei fimbo hohoanimo ra hiniᅇgirihi hehi, napo semindimbo pipi ranambe tiᅇirifoyeihanei. Aiana awarihoei-randeimbi napo semindimbo tiᅇirifoyei arihüdi, ᅇga ro awarihoeifekoateyo-randeimbi napo semindimbo tiᅇirifoyefi arihundi. ²⁶Ranimboane ro nindou napo semindimbo pipiyuhü amuri himbokoate ahu nahurai-ayahi. Asu nindou fifahi yaᅇgoambe diboadore yaᅇgora arandi nou raweheandi, ᅇga moai mamikari yaᅇgorihandi, ᅇga wani. ²⁷Iᅇga ro hohoanimoyahi süᅇgufembo tiᅇirifoyahühi wandi fi yamundihe arihandi.

Iᅇgiri sihiri Israer hohoanimomayeie süᅇgundihundi

10 ¹Wandafi mami, sihefi amoa mami ai Moses süᅇguhorani, nine-moatükuni aheimbo-so tükümeᅇyondüri ranahambo-animbo hoeindihirühi ndondihi hohoanimo ra türiboadihindi. Aiana hamburi siriwara aboeda bamarihendi munᅇuambo mburüᅇgai mami ranihoarehi nimboeimbo. ²Mburüᅇgai-ambeyo asu siriwara-ambeyo ra ai Mosesindi süᅇgurihüdeie-mbimboyahi hundürimayeie. ³⁻⁴Nindou munᅇuambo ai God sesi masendi ra sahüsi asu, God hoe masendi ra simindei marihüdi. Asu ai hoe ra masimindei Godindi nimoeie aboedambehindi asu nimoeie ra ahei süᅇgu maho. Nimoeie ranana Kraie-ani. ⁵Iᅇga asu God ai nindou afindi aheimbo hihifi-hihifikoate-yundürihi, asu ranimboyo nimeie wohi furikoate-reandühi yifisafiyehi, ahei yifinimoko ranai moani mamikare kurimayo.

⁶⁻⁷Rani-moatükuni aheimbo tükümeᅇyondüri ranana sihiri hoeifembohünda nafuimboane. Nindou bidifiri ai moaruwai moatükuni ra süᅇgumarihüdi asu sisami god ranahambo süᅇgurihi marihüdi, ranimboyo se-amboani rani-moatükuni ra yowani rani-süᅇgufepoani yaho haya yare nafui-mayo. Bukambe yare hoafiyowohü yahoya, “Nindou ai sesesiyö asu wain hoe simindirambo nimareimbo, asu ai botiyahi hihifi-hihifiyeiehi nimorehi sisihimoyeie marihüdi,” meho. ⁸Sihiri ana nimorehi sisihimo, nindowenihi birabiri hohoanimoyopoani, nindou bidifiri ramehindi nou. Raniyo mami-simboani 23,000 nindou ai yifisafie kurimayeie. ⁹Ranimboane asu sihiri ᅇgiri Adükari ahambo sisindindhurühi, randihuri hoeindihuri nindou bidifiri ai ahambo ramarihori nou. Aiana ramarihori ranimboyeie aheimbo amoasiri ai tikiramarandüra yifisafimayeie. ¹⁰Nindou bidifiri ramehindi nou, sihiri nini-moatükuni tüküᅇyoani hoafiyö hoᅇgopoani. Iᅇga ranimboyo nindou bidifiri ranai ramehinda sünambehindi nendi nindou hifokoare-randeimbi ai aheimbo moaruwaimbo-mareandüri.

¹¹Rani-moatükuni aheimbo tükümeᅇyondüri ra nindou bidifirambo nafuimbo nahuraiyo, ᅇga ranimboyo asu rani-moatükuni ranahambo

sihefimbo ahini hoafombohunda sürü papiru masihoemo. Sihiri ana ndeara bidifiranambo si tüküfembo bidifirühanefi animboefi nda. ¹²Ranimboane asu nindou mami ai hoafiyuhüya, “Roana nginindi nimboambo-anahi,” ehu ana, moani ai hibadambo-animbo nungu, nga asu ai pündümbui. ¹³Nine refe hoeifembo moatükuni siheimbo sowahi tüküme Feyondüri, ranana rani-poanimbo moatükuniyopoani, nga wani. Siheimbo sowahi tükefeyondüri ra bidifirambo amboani tüküfendüri arandi nahurai-ane. God ai hoafiyu masihendi hohoanimo rasunguareandi ana, asu ngiri nini-moatükuni siheimbo refe hoeifembo tükefeyo ranai sihei nginindi ranahambo ngasündeandi, nga God ai siheimbo ngortü-sungunde fandiheirimbui. God ai-animbo siheimbo nginindamündü-ndürani, asu se nginindi nimboeimboyei nine-moatükuni siheimbo refe hoeifembo tüküfe simboani. Ranimbo asu ai siheimbo aboedi nafi koandiheira tükündahimboyei.

Sihiri ngiri God asu moaruwai nendi yibobo süngundihundi

¹⁴Wandafi mami hondü, ranimbo-animbo se moaruwai nendambo didibaffi rani fikimi hopoani. ¹⁵Se fifirihindeimbi nindou-aneisi, nga ro siheimbo hoafi nda hoafehandüri, nga ro hoafayahi nda se siheihouri türüboadihindi. ¹⁶Adükarindi kap nda Godimbo didibafiyahu hihifirihuri mburihu simindefi arihundi ra sihefimbo Kraisindi horinambo mamihüreamuni arandi. Sapo bret bidifiri hifitirihu arihundi ra Kraisindi fi ranifihü mamihüreamuni arandi. ¹⁷Sapo bret mami engoro ranimbohündambo wamboane, asu nimorehi nindowenihi sihiri afind-anefti, nga fi mamayefi. Sapo muḡuambo sihiri bret mami ranahandamboane sahusifi arihundi. ¹⁸Se Israer nindou ranaheimbo hohoanimo-ndahündüri. Ranihündambo nindou ana ai Godimbo fondiwami sesi sihefeimbindambo sahusimbi, ranai ana sapo sesi Godimbo sihefeimbi babidimboyei ai mamühüyahü marihündi.

¹⁹Se ngiri randihü hohoanimondeihüya, Ro Por tikai godimbo sesi saimbo ra anihond-ane asahi mbisei. Roana moai tikai god ranahambo anihond-ane sahi. ²⁰Wani, nga ro rarihe hoafayahi: Nine-moatükuni Godimbo süngufekoate nindou ai sesi asihendi, ranana ai moaruwai nendi ranaheimbo hohoanimoyahündürihanei aheimbo asihendi, nga Godimbo ana wani. Ranimboanahi ro siheimbo moaruwai nendi rani-babidimbo mamühüfembo yowani asahandüri. ²¹Se ngiri Adükarindi kap ranambe ndimindei asu moaruwai nendi-yafe kapambe ndimindei ndihündi. Asu se ngiri Adükarindi sesi dagüdi asu moaruwai nendi-yafe sesi ra dagüdi ndihündi. ²²Awi sihiri randihundani, Adükari ai sihefimbo ngusüfoambe moaruwaimbo-mbireamuni sefimboyefa? Asu sihefi nginindi ra ahandi nginindimbo ngasündeamboyo?

Muḡuambo si aho ra Godimbo aboed-ani yahomboane

²³Bidifiri seiya, “Muḡuambo moatükuni ra sihiri randihumboane,” ase. Yinisi, nga asu ngiri muḡuambo moatükuni sihiri rawarihu hefi

ranai sihefimbo fandihemuni. Bidifiri seiya, “Muṅguambo moatükuni ra sihiri randihumboane,” ase. Yinisi, ṅga asu muṅguambo moatükuni sihiri rawarihundi ranai ṅgiri fandihemuna ṅginindi nimboefi. ²⁴Nindou mami ai ṅgiri ahandi fimbo yaṅgiri hibadandi, ṅga wani. Nindou muṅguambo ai ṅgorümbo fehefembo hohoanimondei.

²⁵Muṅguambo maketambe ninihondi safi sahümündeimbi ranana dagüdi, ṅga ranahambo aboedimbayo mbisei hehi afindi hohoanimondeihi düdu-düdunde wakindihimboyei. ²⁶Ṃga Bukambe yare hoafiyowohü yahoya, “Hifi ndan-ane asu muṅgu-moatükuni hifi ranifihi eṅgoro, ranane muṅguambo ra Adükarindi yaṅgir-ane,” meho. ²⁷Asu nindou mami Godimbo anihondümböfo-koateyuweimbi ai siheimbo ho ahandi worambe sesimbo hoafinduan, asu se hombo hohoanimoaye ana, nine sesi siheimbo asahündüri ra se dagüdi. Ṃga asu se ranahambo afindi hohoanimondeihü, düdu-düdunde wakindihimboyei. ²⁸Ṃga asu nindou mami ai hoafiyundürühiya, “Sesi ndanana moaruwai nendambo sihefimbihünd-ane,” mbüsüwani ana, se sesi ra dagüdimboyei, nindou ai yare hoafimayu mbisei hehi asu ṅgusüfoambe moaruwai-ane yaho hohoanimombohünda. ²⁹Ro sihei ṅgusüfoambe moaruwai-ane yaho hohoanimombo-yahipoani. Ṃga nindou ṅgorü ai ṅgusüfoambe ranahambo moaruwai-ane mbüsümbui ranimbo hohoanimoayah.

Ro wandihoari ana sesi ra dagadimboyahi, ṅga asu nindou ṅgorü ai moaruwai-ane ehu ana, ṅgiri wandi ratüpuri ra gündeandi. ³⁰Asu ro Godimbo hihifirihüni hehea sesi ra sahasihani, asu nimboe nindou ṅgorü ai ro hihifimarihüni ranahambo moaruwai-ane ehua?

³¹Ranimboane asu se sesi ra dagüdi, hoe ndimindei, asu nine-moatükuni aho ra rawarihindi ra, muṅguambo Godimbo adükar-ani yahombo-hündambo-animbo randihindi. ³²Se nini-moatükuni randihindühi Suda-anei, ahei ndifo-anei, asu Godindi nend-anei ranaheimbo hoeindihindühi moaruwai-ane mbiseimboyei. ³³Ro-amboani muṅguambo nindou ai refemboaye rani hohoanimo-ane rarihe arihandi. Roana wandi fi ranahambo farihefembo yaṅgiri hohoanimo-yopoani rarihe arihandi, ṅga wani. Roana muṅguambo nindou ranaheimbo God ai

11 aboedambo-mbireandüri hohoanimo ranane ratüpuriya arihandi. ¹Se wandi hohoanimo ra süngundihi ṅgei, ro Kraisindi hohoanimo süngurihe arihandi nou.

Nimorehi ai mbiro gabudifembo hoaf-ane

²Ro siheimbo hihifi-hihifayahandüri, sapa se muṅguambo si aho ra wambo hohoanimo-yahündirühi, asu ro siheimbo yamundihearühi sihei warambe masahandüri, ra süngurihü hei marihündambo. ³Ṃga ro siheimbo ndani-moatükuni ndanimboanahi ndondihifirindihindi asahi

ra ndahurai-ane: Kraisi ai munguambo nindou-yei mbiro-ani, nindowenihi ai ahandi nimorehi ranahandi mbiro-ani, asu God ai Kraisi ndi mbiro-ani. ⁴Ranimboane nindou dudi ai nindou himboahü mbiro gabude haya, Godimbo didibafifi asu Godindi hoafi hoafayu-ane ra Kraisi mbo moaruwaimbo-rirühi nou-ani. ⁵Ŋga asu nimorehi mami ai ahandi mbiro ra gabudifekoate didibafife arand-ane, asu Godindi hoafi hoafayo-ane ra ai ahandi anamindi ranahambo moaruwaimbo-rerihü nou-ane. Nimorehi ranai ana sapo amoanŋgi-mbeyowa sei hehi, mbiro foarihehindeimbi moani aningö nahurai-ane. ⁶Nimorehi ranai ahandi mbiro ranahambo gabudifembo wanindowohü ana, ai mbirinaŋi ra bodifo kikirandühi tüpurimbiri-hendamboane. Ŋga asu nimorehi ranai ahandi mbiro ra kikiyo foarihefembo amoanŋgindowohü ana, asu ai mbiro ra gabudi-mbireandamboane. ⁷Ŋga asu nindowenihi aiana ahandi mbiro ra gabudeambui. Aiana sapo Godindi ndüreimbi asu ŋginindi nafuimbo sisami nahurai-ani. Ŋga asu nimorehi ahandi ra süngumbo nindowenihi ai ndüreimbi-ndümbui. ⁸Ŋga moai nindowenihi ai nimorehindi hamindinambo tüküfiyu, ŋga nimorehiyo nindowenihi ranahandi hamindinambo tüküme feyo. ⁹God ai moai nindowenihi ranahambo nafirüri nimorehi ranahambo fehefembohünda, ŋga wani. Ŋga nindowenihi ranahambo fehefembo-hündamboyo nimorehi ra nafimarandi. ¹⁰Rani-mayowamboane sünambeahindi nendi ai hoeifeyoani, nimorehi ranai Godindi ratüpuri ratüpurayo ra nafuimbohünda, ai ahandi mbiro ra gabudi-mbireandamboane.

¹¹Ŋga Adükari-babidi animboefi ranana nimorehi ai moai aheipoanimbo niboadei rihünda. Asu nindowenihi ai moai ahamundi-poanimbo niŋgomo rundi, ŋga wani. ¹²Ŋga God ai nimorehi ranahambo nindowenihi ranahandi finambo randi nafimaranda, nimorehi ranai tüküme feyo. Ŋga asu God ai haponda nindou ranahamumbo nimorehi-yei furambe nafirapuri arandi. Asu mungu-moatükuni ra Godindi süngu-ane tüküfe arandi. ¹³Siheihoari hoafi ndanahambo türüboadihindi: Ranimboane asu nimorehi ai ahandi mbiro ra gabudifekoate, nindou himboahü Godimbo didibafife hoafi ra aboediyo? ¹⁴Nindou sihefi hohoanimonambo yangir-ane siheimbo rahurai nafuiyo arandi. Nindowenihi ai mbirinaŋi hoandarümbi ana, aboedi hamindiyopoani. ¹⁵Ŋga asu nimorehi ai mbirinaŋi hoandarümbayo ana, ranamboani aboedi himbombeyo-wamboane. Sapo rani-moatükuni ra God ai ahandi mbiro gabudifembohünda masagado-ane. ¹⁶Ŋga nindou mami ai rani-moatükuni ranahambo hoafindu hoanŋguhü ana, ai ranahambo ndore tümbifoareand-amboane: Roanahi asu Godindi nend-anei ro moai ŋgorü hohoanimo süngurihu rihünda.

Adükarindi sesi sesimbo

¹⁷Ŋga hapoana ro siheimbo bidifiri moatükuni yamundiheandüri samboanahi, ŋga asu se nine-moatükuni ratüpuriyei arihünda

ranahambohünda ngiri ro siheimbo hihifi-hihifi-ndahandüri. Se Godindi hoafi himborimbo fandihindühi, asu se moaruwai hohoanimo afindi hohoanimoaye ra moai nindou farihendüri randi. ¹⁸Siheimbo ndani hoafi nda boatei hoafinda samboanahi: Asu seana fandihindühi yikürübüyei wakirihi-ndühanei. Ro rani hoafi ra rarihe rahurai himborimayahi, nga asu ro hoafi ranahambo akidou anihondümbomariheandi. ¹⁹Nga awi anihondü yikürübüfe hohoanimo tükümbifeyo-wamboane, sapo düdi sihei mbusümo animboei ranai Godindi hohoanimo sünguarihindi ra ndorih hoeimbiri-hindamboane. ²⁰Ranimboanei asu se mami fandihindühi, asu Adükarindi sesi ra ndofe mami nimarimbo sesikoate-maye. ²¹Rananei asu nindou mamami se sesi ra siheipoanimbo sahümündi hehimbo, nimai sahüsi arihündi. Ranane asu nindou bidifiri ai moani wembopo nimareiani, asu bidifiri ai afindi hamindi sahüsihi, hoe simindeihi, hohoanimo mamikararandüri arandi. ²²Awi se sesi, sesi asu hoe simindi rambo ra worikoate-wamboyeyi? Asu se Godindi nendi ranaheimbo moananei seimboyeyi, wandafi mami bidifiri ranaheimbo sesi napokoate ai mamareia, amoaningambo-arihindüri. Ro siheimbo nüngundihe hoafimandahandür-a? Awi ro siheimbo hihifi-hihifi-mandandüriyo? Wani yangir-ane.

²³⁻²⁴Yamundife hohoanimo nda Adükarindi-mayo sahamindi heheambo-anahi, asu siheimbo masahandüri: Rani nimbokoani Sudas ai Adükari Sisasimbo hürütümbi nindou-yomondi warihümariramboyu asu ai bret mami ra semündü haya, Godimbo hihifirüri mbura, hifitire haya, hoafiyuhü yahuya, “Bret nda wandi fisaf-ane, sihamumbo farihefepuri-mbohünda. Ndani-moatükuni nda se randu ndundi, wambo hohoanimombohünda,” mehu. ²⁵Raniyu asu sesi ra sowasümo mburu, mare yare yahurai kap amboani semündü haya, hoafiyuhü yahuya, “Kap ndanana Godindi simbori hoafi femindi sihefe moatükun-ane, asu wandi horinambo nginindi tükündifemboe. Ndani-moatükuni nda se nini-simboani-yomo asimindimo ra se randu ndundi wambo hohoanimo-yondirimbohünda,” mehu. ²⁶Munguambo si ra se bret nda sahüsi asu kap ndanambe simindi arihündi ana, Adükari ai yifimayu ranahambo weindahi hoafiyeyi rihündühanei. Rani-moatükuni ra se randihi ngeiani, asu Adükari ai hihirifi mbikusuwamboane

Nindou ai Adükarindi sesi moaruwaimbo-areandi ana, ai hüti-ani

²⁷Ranimboane nindou düdi ai ndofe hohoanimo-koateyuhü, ai bret ra sesü, asu kap ranambe hoe sümündü arandi ana, Adükarindi fi asu hori ra moaruwaimbo-reandühani, asu nindou ranai ahandi fi hüti-anandi. ²⁸Nindou ai moani ahandi fi ranahambo hohoanimondu hoeindeandühi animbo, ai bret ra dedü asu kap ranambe hoe ndümündü ndandi. ²⁹Rani-moatükuni ra rahurai-ane: Nindou düdi ai Adükarindi fi

ranahambo ndofe hohoanimo türüfoefekoateyu haya, moani sesi ra sesi, kap ranambo hoe simüdi arandi ana, ai ahandi fi ra ahandihoari hüti-anandi. ³⁰Sapo ranimboanei nindou afindi se angünimboyeihi, hamindi kemindikoate-yeihi, asu bidifiri ai yifimaye. ³¹Asu sihiri sihefihoari sihefi fi ranahambo türüfoarhundühi, bret sahusifi, asu hoe asimindexi ana, Godindi himboahü ngiri hütindexi. ³²Ŋga asu Adükari ai sihefi hohoanimo ranahambo türüfoare-amunühi, aboedikoate-mayowambo sihefi hohoanimo ngorü-süngure arandi. Ai sihefimbo rawareamunanimo, asu sihiri ngiri hifi ndanihundambo nindou rawehindi nou, ai-babidi awarindihehundi.

³³Wandafi mami, rani-mayoamboane, asu se sesimbohünda fandihindühi ana, awi se sesimbo mbiseimbo ra bidifirambo hibadihundüri hehimbo animbo, mami dagüdi. ³⁴Nindou düdi ai wembombonduhi ana, ai ahandi worambe animbo mbisesüwamboane. Rananimbo asu se mami fandihindühi amboani, asu ngiri Godindi papi-hoafi ranambe ngei. Bidifiri hoafi awi engorosi, nga asükainda tükündaheandüh-animbo ranamboani didiboado-ndiheamboyahi.

Yifiafi Aboedindi-mayo rani-poani rani-poani ratüpuri moatükuni

12 ¹Wandafi mami, rani-poani rani-poani ratüpuri Yifiafi Aboedi sai-arandi ranahambo se ndorihi fifirimbirihinda samboanahi. ²Horombo se Godindi hoafi süngufekoate nimboeiambe, rani-simboani ana munguambo si maho ra sisami god hoafikoate, yifi nahurai mengoro, rani sowanamboyo ai siheimbo hürihümüdi-hündüri hei marihünda, asu rani-süngu hei marihünda ra se fifirihimboanei. ³Ranimboanahi asu se ndani-moatükuni ranahambo fifirindhindi asahi, ra ndahurai-ane. Asu Yifiafi Aboedi ranai nindou ngorüdi fiambe amaro-ana, nindou ranai ngiri hoafindühiya, “Sisas ai moaruwaimbo-mbifiyu-wamboane,” mbüsu. Ŋga asu nindou mami ai hoafiyuhüya, “Sisas ai Adükar-ani,” ehu ana, asu ai Yifiafi Aboedindi süngu yanggir-ane hoafiyu arandi.

⁴Yifiafi Aboedindi ratüpuri ra afind-ane engorosi, nga asu awi Yifiafi ranana mami rani yanggir-ane sagadüri arandi. ⁵Adükarindi ratüpuri ra rani-poani rani-poani ratüpur-anesi, nga asu Adükari mami ranahamboane ratüpuriyei arihündi. ⁶Rani-poani rani-poani ratüpuri nginind-ane, nga God mami ranai-ani nindou mungu ranaheimbo nginindi ra sagadüri arandi. ⁷Yifiafi Aboedi ranane ahandi-mayo nginindi ra nindou mamami ranaheimbo tüküfe arandi nindou munguambo farihefe-ndürimbohünda. ⁸Nindou ngorumbo Yifiafi Aboedi ranai nginindi sagadowohane ndofe hohoanimo wataporimbo-yondürimbohünda. Ŋga asu nindou ngorumbo mare Yifiafi mami ranai nginindi sagadowohane ndofe fifirife ranahambo wataporimbo-yondürimbohünda. ⁹Yifiafi mami ranane nindou ngorumbo

anihondümböfo hohoanimo ra sagado arandi. Asu mare Yifyafi mami ranane ai nindou ngorümbo nindou anğünümbo-yeimbimbo didiboado-fendüri-rambo nğinindi ra sagado arandi. ¹⁰Asu nindou ngorümbo hepünifeimbi moatükuni refembo nğinindi ra sagado arandi. Asu nindou ngorümbo Godindi hoafi hoafiyo rambo nğinindi ra sagado arandi. Asu ngorümbo ai Yifiafi Aboedindi-mayoyo asu moaruwai nendiyei-mayoyo ratüpuri ra türüfoefembohünda nğinindi ra sagado arandi. Nindou ngorümbo rani-poanimbo hoafi hoafimbo nğinindi ra sagado arandi. Asu ngorümbo rani-poanimbo hoafi hihirifoefe hoafi nğinindi ra sagado arandi. ¹¹Yifiafi Aboedi mami ranane ai rani-poanimbo rani-poanimbo nğinindi ranahambo yare arandi asu ai-ane moani ahandi hohoanimonambo yanğiri nindou mamami ranaheimbo nğinindi yiboborearü arandi.

Munğuanbo sihiri fi mami ranahandambo bidifir-ane fi

¹²Fi ra mam-anesi, nğa asu ngorü-poani ngorü-poani moatükuni ra ranifihi papireamboane. Ahandi rani-poani rani-poanimbo moatükuni afind-anesi, nğa fi mami ranifihi türemarand-ane. Kraisi ai rahurai-ani. ¹³Mami rani-sünğumboane munğuanbo sihiri, Suda, Suda-yafe ndifo, moani ratüpuriyei-rihündeimbi, asu moani nimboeimbi nindou, sihiri fi mami raninambo hundürimayefi. Asu munğuanbo sihefimbo God ai Yifiafi mami ra masemuni.

¹⁴Fi ranana moani mami moatükuninambo yanğiriyopoani pare haya anıngo. Aiana afindi rani-poani rani-poani moatükuni ra papire mburamboane fi ra mami nahurai anıngo. ¹⁵Asu tıjari ai hoafindowohüya, “Roana watıjari-yahipoani, ranimboane asu ro fi ranahandi-yahipoani,” mbisimboesi, nğa sapo aiana fi mami ranahandamboane. ¹⁶Asu himboambe ai hoafindowohüya, “Roana himboariyahipoani, ranimboane roana fi mami ranahandiyahipoani,” mbisimboesi, nğa sapo aiana fi mami ranahandamboane. ¹⁷Asu fi munğuanbo ranai himboari rani yanğirayo ana, asu nünğunde himborimanda? Asu fi munğuanbo ranai himboambe rani yanğirayo ana, nünğunde fisıjarü kamadada? ¹⁸Fi mami ranana ai yahuraiyopoani, nğa God ai moani ahandi hohoanimonambo rani-poani rani-poani moatükuni ra fi mami ranifihi papimareand-ane. ¹⁹İnğa asu fi mami ranahandambo moani mami rani yanğirayo ana, asu fi ranai nahü manıngo? ²⁰Fi ranai moani yare nıngowan-ane, asu fi mami ranifihi rani-poani rani-poani moatükuni ranai papire haya anıngo.

²¹Ranimboane asu nğiri himboari ai watıjarimbo hoafindowohüya, “Ro nğiri sihambo ndahamındihanini,” mbiso, nğa wani. Asu nğiri mbıro ai tıjarimbo hoafindowohüya, “Roana nğiri sihambo ndahamındihanini,” mbiso, nğa wani. ²²İnğa awi sihiri nahaniniyo sihefi fi ranahambo

ranana nginindeimbi-yopoani asefi, rani-moatükuni ranai fi ranifihi paiarikoate-ayo ana, asu ngiri fi ranai aboedi ndonde ningo, nga wani. ²³Asu fi ranahandambo bidifiri moatükunimbo sihiri aboedi moatükuni-yopoani asefi, ranahamboanefi sihiri aboedi yihuruhi arihundi. Nga asu fi ranahandambo bidifiri amoaningimbi moatükuni ranahamboane aboedi didiboado-arihundi. ²⁴Fi bidifiri aboedi ra moani hiningirihu arihundi. Nga God aiyu ahandihoari muṅguambo rani-poani rani-poani fi bidifiri ra fi mami ranifihi mamambere hiningimareandi. Raniyu asu fi bidifiri ranahambo moanane asefi ranahambo ai ndorihoeimbi hiningire marandi. ²⁵Fi mami ranai ṅgorü-poani ṅgorü-poanimbeyo yahuhayambo yare hiningireambo-yupoani, nga fi mami bidifiri, mami bidifiri ranai mami hohoanimo süngu simbori farihefirü-mbeyeia yahuhayambo yare hiningimareandi. ²⁶Ranimboane fi ra ṅgorü mami bidifiri asübusimboayo ra, asu fi mami muṅgu ranai-amboani asübusiyowohane. Asu fi ra mami bidifiri aboed-ane asefi ana, asu muṅguambo fi ranai-amboani aboedi hihifi-hihifiyowohane.

²⁷Ranimboane muṅguambo nindou se Kraisindi fi-ane animboei. Asu muṅguambo se ahandi fi bidifiri nou-aye. ²⁸God ai bidiframbo Kraisindi nendi-maye ranaheimbo rahurai yare hiningimarearü. Weṅgurühididi ranai Kraisindi hoafi sowandümo homo-rundeimbi, ranikiminindi ranai Godindi hoafi hoafiyei-rihündeimbi, asu ranikimi ra yamundu-rundeimbi, asu hepünifeimbi moatükuni rarihi-rihündeimbi, asu nindou ṅgünümbe aboedirihi-rihündeimbi, asu nindou farihehi-rihündeimbi, asu muṅguambo ratüpuri aho ra hifandirühi-rihündeimbi, asu ṅgorü-poanimbo hoafi hoafiyo-ramboane ranaheimbo hiningimareandüri. ²⁹Awi nindou muṅguambo Kraisindi hoafi sahümündi hei-rihündeimbi yanggiriyei animboeia? Awi muṅguambo Godindi hoafi hoafiyei-rihündeimbi nindou yanggiriyei animboeia? Awi muṅguambo yamundihi-rihündeimbi nindou yanggiriyei animboeia? Awi muṅguambo hepünifeimbi moatükuni ratüpuriyei rihündeimbi yanggiriyei animboeia? ³⁰Asu muṅguambo nindou ai ṅgünümboyeimbimbo aboedi-fendürimbo nginindeimbi yanggiriyeia? Muṅguambo nindou ai ṅgorü-poanimbo hoafi ra hoafiyei-rihündeimbü yanggiriyeia? Asu muṅguambo nindou ai hoafi ra hihirifoadihi hoafiyei-rihündeimbü yanggiriyeia? E! rani-moatükuni ra ai wani. ³¹Se moani aboedi hamindi moatükuni rani yanggiri semindimbo ṅgusüfo pandihindi.

Sihiri nindou amurambo ṅgusüfo pandihumboane

Nga ro siheimbo nahaniyo aboedi hamindi nafi aho ranahambo nafuindahandüri samboanahi.

13 ¹Asu ro nindou ranaheimbo nindou-yei hoaf-ane, asu sünambeahindi nendi-yomondi hoafi ranane ra

hoafiyahandürühi, asu ro nindou ranaheimbo ngusüfo pefekoate-ayahi ana, asu ro nümüsi fandiyoani, moani hoafayo hoango nahurai-ndamboayahi. ²Asu ro Godindi hoafi hoafindahandürühi, Godindi hohoanimo dibo engoro ra muṅguambo fifirariheand-ane, asu muṅguambo fifirife ra fifirariheand-ane, asu ṅginindi hamindi anihondümborihandühi asu nimoei-wafu nimaroani hoafiyahani gorügoanini aho-ane, asu ro nindou ranaheimbo ngusüfo pefekoate-ayahi ana, asu ro moan-anahi. ³Ro wandi napo muṅguambo masihehandi ra napokoate-yeimbi nindou fehefendürimbo yimbondihe, asu wandi fi ra hiniṅgi-ndiheandani nindou ai wambo haiambe mandundirani hai tikirinda-ndirimboesi, ṅga asu ro ṅgorü nindoumbo ngusüfo pefekoate-ayahi ana, ra ṅgiri wambo aboedi fandihendiri.

⁴Ṫgorümbo ngusüfo pare-randeimbi ai wari hoafeandüh-reandühi farihendüri arandi. Asu ai moai nindou ṅgorümbo ngusüfoambe moaruwai hohoanimoyu randi, asu ahandi fimbo moai boriyu randi, asu moai ahandi fimbo hihifi-hihifiyu randi. ⁵Ai moai afindi-afindiyurandi. Asu ai moai ahandi moatükunimbo yanggiri hohoanimo pare randi, asu moai nimehünou ṅginindiyu randi. Asu ai moai nindou ahambo moaruwaimbo-marihori ranahambo hohoanimoyu randi. ⁶Asu ṅgorümbo ngusüfo pare-randeimbi aiana nine-moatükuni moaruwai-ayo ranahambo moai hihifi-hihifiyu randi, ṅga aiana anihondü hohoanimo ranahamboane hihifi-hihifiyu arandi. ⁷Ai ana muṅguambo tiṅgirifo aho ra moanane yahu arandi, asu muṅguambo si aho ra Godimbo anihondümboriri randühani. Muṅguambo si aho ra God ai fandihendirimbui yahuhaya, hifandandühi asu muṅguambo tiṅgirifo ra tüküfeyoani, ai ṅginindi nünṅumboani.

⁸Ṫgorümbo ngusüfo pefe hohoanimo ra ai ṅgiri awarindihoayo. Ṫga Godindi hoafi hoafombo hohoanimo ranana kikindamindimboe. Rani-poanimbo hoafina hoafi hohoanimo ranana moendindimboe. Fifirife hohoanimo ranana awarindihoemboe. ⁹Muṅgu-moatükuni aho ra moani bidifiri-bidifiri yanggir-ane fifirihumboayefi. Godindi hoafi hoafimbo ranamboani awi moani bidifiri yanggir-ane hefi hoafiyefi arihundi. ¹⁰Ṫga süṅgunambo nine-moatükuni aboedi hamindi-mayo ranai tükündifeihi animbo, asu nine-moatükuni moani bidifiri-bidifiri yanggiri hohoanimomayefi ranai awarindihoemboe. ¹¹Horombo ro nimori-yahambe rani-simboani wandi hoafi, hohoanimo, fifirife rani-moatükuni ra nimori nou rasüṅgumariheandi. Ṫga hapondani ana ro adükari-yahühi nimoakidibou-yei hohoanimo ra hiniṅgi-riheamboanahi. ¹²Haponda muṅguambo moatükuni awi moai sihiri ndorihu fifirihundi, ṅga hoehimboambe nahurai-ane hoeirihu arihundi. Ṫga süṅgunambo animbo sihiri Godimbo ndondihuri ahandi ṅgusümboari ra hoeindihumboayefi. Hapondani ana moani bidifiri yanggir-

ane fifirariheandi. Iŋga süngunambo-animbo ro ahambo nondihini fifirindi-hinimboyahi, ai wambo haponda ndore fifirareandiri nou. ¹³Iŋga haponda ŋgimi moatükuni nda, Godimbo anihondümbofe hohoanimo, Godimbo anihondümbofehü himboyondombo hohoanimo, asu nindou ŋgorümbo ŋgusüfo pefe hohoanimo ra moani koadürümbo-koadürümbo yagodimboe. Iŋga ŋgimi hohoanimo ranahandambo, ŋgorümbo ŋgusüfo pefemboane ai adükari hamindayo.

Godindi hoafi hoafimbo hohoanimo pandihumboane

14 ¹Munŋuambo si aho ra nindou bodimondambo ŋgusüfo pefembo hohoanimoyo homboane. Asu se Yifiafi Aboedindi-mayo ŋginindi rani semindimbo hohoanimondei ŋgei. Iŋga Godindi hoafi hoafiyorambo ŋginindi ranimbo se moani ŋgusüfo pandihindi. ²Nindou düdi ai rani-poanimbo hoafinambo hoafayu ana, nindou ranaheimbo hoafiyundürühi-yupoani, ŋga ai Godimbo yanggir-ani hoafayu. Sapo hoafi ra nindou ranai ŋgiri fifirindhindi, ŋga ranana Yifiafi Aboedimayo ranahandi ŋginindinambo Godimbo yanggir-ani dibo hoafi hoafiyundo arandi. ³Iŋga asu nindou düdi ai Godindi hoafi hoafayu ana, asu ai nindou ranaheimbo anihondümbofe ra ŋginemindindürühi farihendürühi, asu ŋgusüfoambe aboedi didiboado-rearühane. ⁴Nindou düdi rani-poanimbo hoafinambo hoafayu ana, ai ahandi fi ŋginemindimbo yanggir-ani hoafayu. Iŋga asu nindou düdi ai Godindi hoafi ra hoafayu ana, asu hoafi ranai Kraisindi nendi ranaheimbo ŋginindamündürimboe. ⁵Ro siheimbo munŋuambo rani-poanimbo hoafinambo hoafindei sahehea hohoanimoayahisi, ŋga awi ro siheimbo Godindi hoafi hoafiyo-ramboanahi hohoanimoayahisi habodihisi. Nindou düdi ai rani-poanimbo hoafinambo hoafinduanani asu nindou ŋgorü ai hoafi ranahambo hihirifoefe hoafiyoani animbo, asu Kraisindi nendi munŋuambo ranaheimbo hoafi ra fandihendürimboe. Iŋga nindou düdi ai Godindi hoafi weindahi hoafayu ranana rani-poanimbo hoafinambo hoafimbo ŋgasündeamboane.

⁶Wandafi mami, awi ro siheimbo sowahi tükündaheandühi rani-poanambo hoafinambo hoafindahandürani ra ro ŋgiri siheimbo fandiheandüri. Iŋga ro siheimbo God ai wambo bidifiri moatükuni weindahi-mareandiri hoafi, fifirifembo moatükuni hoafi, Godindi hoafi hoafiyorambo hoafi asu yamundifembo hoafi ra ndahandüran-animbo, siheimbo fandihehe-andürimboyahi.

⁷Hoahoango rakoate-randeimbi moatükuni, nümüsi, fufuŋi, mbonifaifai ranamboani moani mami rahurai-ane. Rani-moatükuni munŋuambo ranai mamikari hoafindoani ra nüngundihini nindou ai himborimandei hoafi ahandi rana? ⁸Nindou ai yifiarimbo yinafoaiyu-randeimbi ai ndofe yinafoaikoate-ayu ra, asu nindou didai yifiarimbo

napo ra didiboandomanda? ⁹Moani mare yahurai-ane, asu se rani-poanimbo hoafinambo hoafayei ra asu nindou amuri ai nüngundihisi sihei hoafi fifiri-mandihinda? Ranana se moanipo hoafindamboyafi, nga sihafi hoafi ranai moani weri-yafui nou nimoamo ngombœ! ¹⁰Yini, muŋguambo hifi ndanihü rani-poani rani-poani hoafi afind-ane eŋgoro. Ŋga asu moai mamami hoafi ranai ranahandambo nimindi fifirifekoate yaŋgoro, nga wani. ¹¹Ŋga asu ro hoafi wataporayu ranahandi nimindi ra fifirifekoate-ayahi ana, nindou hoafayu ranai wandi nindou amurinduanu asu ro-amboa ahandi nindou amurindamboyahi. Se rani-poanimbo hoafinambo wataporindeiani siheimbo yahurai tükündifemboe. ¹²Ŋga se-amboa Yifiafi Aboedindi-mayo ŋginindi ra semindimbo hohoanimoyei arihündi ranimboane asu se Kraisindi nendi fehéfembo ŋginindi ra semindimbohünda tijirifondei ŋgei.

¹³Ranimboane nindou düdi ai rani-poanimbo hoafinambo hoafiyu-randeimbi ana, ai hoafayu ranahambo Kraisindi nendi ranaheimbo hihirifoeffe hoafombohünda ŋginindi ranahambo Godimbo didibafimbiyiwamboane. ¹⁴Asu ro rani-poanimbo hoafinambo didibafefheandi ana, wandi yifiafi ranai-ane didibafefeyo, nga asu wandi hohoanimo ranai ana moani moaruwai titanimbo-reamboane. ¹⁵Asu randifeyoani ra ro nüngumandihea? Ro wandi yifiafi ranambo didibafinda-heamboyahisi, nga asu ro wandi hohoanimo ranambo amboani didibafinda-heamboyahi. Ro wandi yifiafi ranambo heründa-mboyahisi, nga asu ro wandi hohoanimo ranambo amboani heründamboyahi. ¹⁶Godimbo se sihafi yifiafi ranambo yaŋgiri hihifariri ana, asu moanindi nindou-mayei ranai fandifeambe ŋgiri hoafindeihi, “Anihond-ane,” mbisei se hihifiyafambe. Sapo se hoafayafi ranahambo ana nindou ranai moai fifirihindi. ¹⁷Godimbo hihifimbo didibafife sihafi ra aboedi saf-anesi, nga ŋgiri nindou ŋgorü ranahambo ŋgininda-mindündüri. ¹⁸Ro afindimboanahi rani-poanimbo hoafinambo Godimbo hoafiya arihandi ra siheimbo ŋgasündihea-ndürimboanahi asu ranimboanahi ro Godimbo hihifarihüni. ¹⁹Ŋga Kraisindi nendi fandifeambe roana, moani nindou ai fifirihindeimbi hondahüfeimbi (5) hoafi yaŋgiri yamundife-ndürimbo hohoanimoayahi. Ŋga asu hoafi moani afindi hamindi rani-poanimbo hoafinambo wataporimboyo ho ana, aboedi hamindiyo poani.

²⁰Wandafi mami, se nimoakidibou hohoanimoayei nou hohoanimondeimboyei. Moaruwai hohoanimo aho rananimbo se nimoakidibou nou hohoanimondeihi nimboei, nga asu sihei hohoanimo ranana nindou boagiri nahurai-animbo se nimboei. ²¹Ahinümbi hohoanimo sürü papirandühi yahoya, “Rani-poanimbo hoafi hoafümbi nindoundi yafambe süngu-ane, asu nindou amuriyei yafambe süngu-ane, rananimbo nindou ndanaheimbo ro hoafindahandüri-mboyahisi, nga asu ai ŋgiri wambo himborindei,” mehu Adükari ai.

²²Ŋga ranane asu rani-poanimbo hoafi hoafimbo ŋginindi ranai nindou Godimbo anihondümbofe-koate-mayei ranaheimbo nafuimbo moatükun-ane, ŋga asu anihondümbo-rihoreimbi ranaheimbo ana wani. Ŋga asu Godindi hoafi hoafimbo ŋginindi ahei mbusümo ranai anihondümbo-rihoreimbi aheimbo nafuimbo moatükun-ane, ŋga Godimbo anihondümbofe-koate-mayei ranaheimbo ana wani. ²³Ranimboane asu Kraisindi nendi ranai mamühi fandihindani se rani-poanimbo hoafinambo hoafayei ana, asu fifirifekoate-yeimbi asu anihondümbofe-koate yeimbi ranai tükündahi siheimbo hoeindihindürihi, ai ana hihindi-hihindiyeihanei mbiseimboyei. ²⁴Ŋga muŋguambo Godindi hoafi rani yangiri hoafindeian-animbo, asu anihondümbofekoate-yumbü asu fifirifekoate-yumbü ai tükündifi-hündambo amboani asu ai hoafi ra himborindu haya moaruwai hohoanimomayu ranimbohünda ŋgusüfoambe afindi hohoanimondimbui. ²⁵Ranimbo asu ahandi hohoanimo dibo meŋgoro ra weindahindeandühi, asu ai yiri yimbu pusinde nimandümbo Godimbo hohoanimonduwohü hoafindühümboya, “Awi anihond-ane, ŋga God ai se-babidi sihei mbusümo anüŋgu!” mbüsümbui.

Godimbo ratüpuri hohoanimo ra aboedi mbihowamboane

²⁶Wandafi mami, asu se nüŋgundihi ramandihinda? Muŋguambo se fandifeambe, nindou ŋgorü ai herü hohoanimonduhane, ŋgorü ai yamundiferambo hohoanimo hohoanimonduhane, ŋgorü ai God ai nini-moatükunimboyo hoafimbohünda nafuimayundoane, ŋgorü ai rani-poanimbo hoafinambo hoafimboane, asu awi asukai sapo ai hoafiyumbi hihirife hoaf-ane, muŋgu rani-moatükuni ra hoafimbeyei-amboane. Muŋgu-moatükuni ra Kraisindi nendi ranaheimbo ŋginimbira-mindüramboane. ²⁷Ŋga asu nindou bidifiri ai rani-poanimbo hoafinambo hoafimbo hohoanimondeihi ana, moani nindou yimbundafandani asu ŋgimindimondani yanggir-animbo rambirundamboane. Ŋga asu moani ŋgorü ai hoafindu kikindamünduani, ŋgorü ai hoafiyu-mbirandamboane. Ranimbo asu nindou ŋgorü ai nine hoafi ŋgorü ai hoafimayu ranahambo hihirifoare hoafimbiyu wamboane. ²⁸Ŋga asu nindou ŋgorü ai rani-poanimbo hoafinambo hoafinduani ranahambo hihirife hoafimbo nindou ranihü niŋgokoate-nduani ana, asu nindou ranai rani hoafinambo hoafindümbui, ŋga moani ai sisikoate nimandümbo-animbo ahandi fimboane asu Godimboane rani yangiri hoafimbiyu-wamboane.

²⁹Yimbu ŋgimi nindou saf-animbo Godindi hoafi hoafimbo-mayo ra hoafimbeyo-mondamboane. Ŋga asu amuri bidifiri ai moani nimarimombo nine hoafi ai hoafayomo ranahambo tümbirundamboane. ³⁰Ŋga asu nindou mami wataporambe amaru ahambo God ai nafuiduani, asu nindou nüŋgumbo hoafayu ranai ahandi hoafi ra

awi kikumbiramündu-amboane. ³¹Rani-süngumbo-animbo nindou muṅguambo mamami Godindi hoafi hoafindimondani, asu nindou muṅgu amarei ranai hoafi ranahambo fifirihindühi ṅginindi mbinimboei-amboane. ³²Godindi hoafi hoafimbo ṅginindi sowandümondeimbi nindou ana ai moani ranahandi ṅginindi ra hifandi-mbirundamboane. ³³⁻³⁴Sapo God ai sihefimbo moai mamakariyo wakiferambo yifiriyu, nga moani aboedi ndorihefe niṅgomboane yifirayu.

Kraisindi nendi muṅgu ai fandifeambe ana, awi nimorehi ai wataporindeimboeyi, nga moani sisikoate nimandei. Kraisindi nendi muṅguambo yahurai-ane rarihi arihündi. Nimorehi aiana ṅgiri hoafindei sapo Mosesindi ahinümbi hoafi hoafimayo süngu ai moani nindowenihi-yomondi hoarehi nimboei. ³⁵Nimorehi ai rani-moatükuni ranahambo fifirifehü türüfofembo mbiseimbo ana, ai ahei nindowenihi ranahamumbo worambe düdumbeyahi-puramboane. Nimorehi ai Kraisindi nendi fandifeambe botife hoafi ana, amoanṅgeimb-ane.

³⁶Awi Godindi-mayo hoafi ra siheimbo sowahindi botife homboyo? Awi asu hoafi ra siheimbo yaṅgiri tüküfemboyo? ³⁷Ṽga asu nindou mami ai rande hohoanimonduhüya, “Ro Godindi hoafi hoafiya-rihandeimb-anahi,” ehuyo, asu “Yifiafi Aboeindi fifirife masahamindihi,” ehu ana, refeana ai fifirimbireand-amboane, nga Adükari ai randihindi mehu hoaf-ane nda ro siheimbo sürü paparihandi. ³⁸Ṽga asu nindou rani hoafi ranahambo himborikoate-ayu ana, asu se ṅgiri ahambo himborindei.

³⁹Ranimboane wandafi mami, Godindi hoafi hoafimbo hohoanimo ranahambo yaṅgiri ṅgusüfo pandihi ṅgei, nga asu se rani-poanimbo hoafina hoafimbo yowani mbiseimboeyi. ⁴⁰Kraisindi nendi fandifeambe muṅgu-moatükuni aho ra wudipoapondihi ndondihi randihindi.

Krais ai yifiyu hayamboyu asükaiyu botimefiyu

15 ¹Wandafi mami, haponda ro siheimbo aboedi hoafi masahandüri ra asükainda hohoanimo botindihendüri samboanahi. Aboedi hoafi ra se sahümündi hehimboeyi asu se ranifihi ṅginindi maniboadei ranahamboanahi. ²Aboedi hoafi siheimbo ro bokarimari-heheandüri ranahambo ṅginindi kikihirihümündi aniboadei hei ana, ranambo se aboedambo-ndahimboeyi. Ṽga refekoate-ndeiani ana, ṅgiri fandihendüri.

³Ro hoafi himboriya heheambo masahamindihi ra siheimbo masahandüri ra ai aboedi adükari moatükuni hamind-ane: Krais ai sihefi moaruwai hohoanimo ra raguanambo-fembo-hündamboyu yifimayu, sapo Godindi hoafi yare hoafimayo süngu. ⁴Ahambo honṅguambe sihehorane, asu ranambe ṅgimi nimbiyu mbura asükaiyu botimefiyu, Godindi hoafi yare hoafimayo süngu. ⁵Raniyu asu ai Pitambo-so boatei tüküfi mburamboyu asu süṅgunambo ahandi 12 süṅgururü-rundeimbimbo-so tükümefiyu. ⁶Raniyu asükaiyu ahandi wandafi

mami 500 ngasündeandeimbi nindou ranaheimbo-so tüküme fiyu. Nindou ra afindi ana animboei, nga asu bidifiri ana yifisafimaye. 7 Raniyu ai Semsimbo-so tüküfi mburamboyu asu süngunambo ahandi hoafi sowandümo homo-rundeimbi-memo muṅguambo ahamumbo-so tüküme fiyu. 8 Raniyu asu süngunambo hondü wambo-so amboa tüküme fiyu. Asu ro furambe sangorambo hapoadümboyaha wakemindi-ndirimbo nahurai-anahi.

9 Kraisindi hoafi sowandümo homo-rundeimbi-yomondi mbusümo ra akidou saf-anahi. Wambo ana Kraisindi hoafi semündü hu-randeimbi mbisei dükandihi-ndirimboyei sapo ro Godindi nendi ranaheimbo moaruwaimbo-marihearü hahi ranimbohünda. 10 Nga God ai wambo moani hipoambo-mareandira ranimboanahi haponda ro Kraisindi hoafi sahamindi ha-rihandeimbayahi. Nga asu ahandi moani hipoambofe hohoanimo ranai moai moanimbofeyo, nga wani. Kraisindi hoafi sowandümo homo-rundeimbi bidifiri ai mungu moai ro ratüpurayahi nou yaru tiṅirifoyomo. Nga roana, wand-amboani moai ratüpuria rihandi. Nga Godindi moani hipoambofe hohoanimo wandi flambe amarondiri ranane farihendira ro rawariheandi. 11 Ranane hoafi ra ro hoafiyahembü hündiyo asu ai hoafiyomondeimbi hündiyo ra sapo mami rani hoafi raniyo bokari-marihehündi ranahambo se anihondümbo-marihindi.

Sihiri yifihündi botife hoafi

12 Krais ai yifimayua asu God ai honguambeahindi botimariri hoafi ra ro afindimbo hoafiyefi marihündi. Nga asu nimboe nindou bidifiri sihei mbusümo animboei ranai hoafiyeihiya, “Nindou yifiyoweimbi-hündi ana, ṅgiri asükaindo botindifeyo,” maseia? 13 Rani hoafi ra anihondümbayombonana, God ai moai Kraisimbo honguambeahindi botiriri. 14 Asu Krais ai yifihündi botifekoate-mbeimbonana asu ro ṅgiri ninimbo hoafiyefi rihunda asu se ṅgiri nini-moatükunimbo anihondümbo-rihindi. 15 Rambefe-mbonanasi, asu ro Godimbo tikai hoafiyefi-rihundeimbi nindou tükümbayahu. Sapo ro ahambo anihondümbo hoafiyefühi sefiya, “God ai Kraisimbo botimariri,” asefi. Nindou yifihündi botifekoate-mbeimbonana, God ai ṅgiri Kraisimbo yifihündi botiriri. 16 Nga God ai nindou yifiyebihündi ranaheimbo botifendürira koatembei-mbonana, asu Krais ai-amboani yifihündi botimbefipoani. 17 Nga asu God ai Kraisimbo yifihündi botifikoateyu-mbonana, asu sihei anihondümbofe ranai siheimbo mbafari-hendüripoani. Nga seana sihei moaruwai hohoanimo ranaianimbo kikihindamindindüri niṅgomböe. 18 Asu anihondümbo rambefembonana, nindou didiyei Kraisimbo anihondümbo-rihori mburihü yifimaye ranai-amboani moaruwaimboyahi. 19 Sihiri ana Kraisimboanefi anihondümbo-rihurühi himboayahundo. Nga asu Krais ai sihefimbo ndanisimboani yangiri fehefemunimbo himbombayefi-

mbonana, asu nindou bidifiri sihefimo hipoanimboembou-anei sahümuni.

²⁰Hohoanimo ra yahuraiyopoani, nga wani. Nga anihondüyo Kraisi ai yifiyu mbura honguambehindi God ai botimariri. Nümbürambehindi horombonambo sesimbo moatükuni boatei nafaramindo nahuraiyo God ai Kraisiimbo boatei yifiyeimbi nindou ai yanggiri botifekoate-yeiambe ahambo botimariri. ²¹Nindou mami ahandi süngu yifimbo hohoanimo tüküme feyo asu nindou mami ai-amboani ahandi süngu yanggiri botifembo hohoanimo tüküme feyo. ²²Sapo nindou mungu ai ra Adamindi sirihünd-anei yifimayu süngu yifiyei arihündi. Nga nindou munguambo Kraisiindi sirihünd-anei botimefiyu süngu botiyahi arihündi. ²³Nga munguambo nindou mamami ahei botifeambe botindahumboyefi. Kraisi ai boateimayu asu ai asükaindu kudüwan-animbo asu nindou ahandi sirimaye ra mungu botindahimboyei.

²⁴Rani-simboan-animbo mungu-moatükuni mungumboayo si ranai tükündifemboe. Rananimbo asu Kraisi ai sanendi, anani, kabomo ra hifandi-rundeimbi, munguambo ratüpuri bogorimboyafu-ndeimbi, asu munguambo nginindi hifandu-ndeimbi ranahamumbo hifinambo-ndeapurimbui. Rananimbo asu ai nginindi hifandarandi ra Ape Godindi wariwami hiningindeambui. ²⁵Awi ranambe ana Kraisi ai bogorimbondüfi nungu ngumbo animbo, asu God ai moaruwai nendi ranaheimbo hifinambo-ndeandüri haya Kraisiindi yirumbo hoarehi hiningindearümbui. ²⁶Amuri hürütümbi ranaheimbo hifinambo-ndeandüri ngu-ngumbo animbo, asu süngunambo hondü-animbo yifi ranahambo amboani hifinambo-ndeambui. ²⁷Godindi hoafi yare hoafiyowohü yahoya, “God ai mungu-moatükuni ahandi hoarehi hiningimareandi,” meho. Nga God ai munguambo moatükuni ranambeyupoani. Ranimbo-animbo sihiri fifirindi-humboane, God ai mungu-moatükuni ra Kraisiindi hoarehi hiningimareand-anesi, nga asu ai moai ahandi hoarehi nungu, nga wani. ²⁸Nga mungu-moatükuni ra Kraisiindi hoarehi yanggirindoan-animbo, asu Godindi Nimori ranai sapo Afindi ai mungu-moatükuni ahandi hoarehi hiningimareandi rani-hoarehindümbui. Rananimbo asu God ai ahandihoari mungu-moatükuni aho ranahambo bogori hondündümbui.

²⁹Nga asu yifiyeimbi ai botifekoate-aye ana, asu nindou bidifiri aheimbohünda himoni hundüriyei arihündi ranai nungurihi-ndühiyeia? Asu yifiyeimbi ai botifekoate-aye ana, asu nimboe nindou bidifiri ai aheimbo fehefe-dürimbohünda himoni hundüriyei arihünda? ³⁰Asu yihoefimbo amboa. Ro Krasindi ratüpuri ratüpurimayefi asu nindou bidifiri ai munguambo si aho ra moaruwaimbo-rihimuni hei arihündi. Asu yifiyeimbi nendi ranai asükaiyo botifekoatembo-aye ana, asu ro nimboe moani ndarihu animboefa? ³¹Wandafi mami, munguambo si aho

ra ro yifimbo nahuraiya arihandi. Ra anihond-ane. Se munḡuambo Sisas Krais-babidi aniboadei ranimboanahi ro siheimbo hihifi-hihifiyahühi weindahi rarihe hoafehandüri. ³²Efesus ḡgoafihü ro nimambeahindi ninihondi-babidi nahurai yifiarimayahi. Ranimbo-hündambo nindouyafe hohoanimo süḡgu ro nini-moatükuni aboedi mandahamindiha? Ḳga asu yifiyeimbihündi nindou ranai asükaindei ḡgiri botindahindi hoafi ra anihondayo ana, ambesi, ḡga sihiri moani, “Sesi dagudifi, hoe ndimindefi raraondihu ḡgefimboane. Ḳga sümbu ana awi sihiri yifindemboyefi,” hoafi mami hoafimayo süḡgu.

³³Se tikai hoafi anihondumbo-ndihimboyei. Sihiri sihefi wandafi moaruwai-mayei rani-babidi ahahabodefi ana, asu ai sihefi hohoanimo aboedi ra moaruwaimbo-ndihimunimboyei. ³⁴Se wudipoapondihi hohoanimondeihi asu moaruwai hohoanimo ra rühüsafi hiniḡgindihindi. Nindou bidifiri seana moai awi Godimbo fifirihori. Ranahandambo se amoaniḡgimbeyei-amboane.

Fi asükaiyo botefeyo ranana ḡgorü-poanimboane

³⁵Nindou bidifiri ai düdudahindühi animboya, “Nindou yifihündi ra nünḡgundihi asükai botimandahinda? Fi ra asükaindo botindifeyowohü nünḡgu-nahurai fi ndemindi haya tükündife manḡgoa?” mbiseimboyei. ³⁶Ranana hihindi hoaf-ane? Se ra fifirowamboanafi nini-moatükuni hoari hifambe hifi kararowandi ranai yifikoate-nahuraiayo ana, asu ai ḡgiri yanggiri aboedi tükündifeyo. ³⁷Se koniyo asu nini manḡgiriyo hifarowandi ra moai emündü düdüdü kameihi hifirowandi, ḡga hoari yanggir-ane hifi kararowandi. ³⁸Ranana asu God ai hohoanimomayu süḡgu düdüdü emündü napo ra ranifihü papareandi. Ranai munḡu nine-moatükuni mamami hoari ranaheimbo rani-poanimbo rani-poanimbo düdüdü, emündü ra sagadüri arandi. ³⁹Munḡu-moatükuni yanggiri niḡgo haya hoahoḡgo-randeimbü ranahei fisafi ana mami simogodi yanggiriyo poani, ḡga wani. Nindou ai ḡgorü-poanimbo fisaf-ane, ninihondi ai ḡgorü-poanimbo fisaf-ane, ndu napo ai ḡgorü-poanimboane. Asu kini ai ḡgorü-poanimboane. ⁴⁰Sünambeahindi moatükuni fi-poanimboane, asu hifi ndanihündambo fi-poanimboane. Ḳga asu sünambeahindi moatükuni ranai ḡgorü-poanimbo fiyomboane, asu hifi ndanihündambo moatükuni ranai ḡgorü-poanimbo fiyomboane. ⁴¹Hüfihamindi ai-amboani ahandi rani-poanimbo fi anandi. Amoamo ai-amboani ahandi rani-poanimbo fi anandi. Asu mupui amboani rani-poanimbo fi anandi, ḡga asu munḡuambo mupui ra bidifiri ai ḡgorü-poanimbo fiyo asu bidifiri ai ḡgorü-poanimbo fiyo ra hoḡgomboane.

⁴²Moani yahurai-animbo nindou yifiyeimbihündi asükaindei botindahinda tükündifemboe. Fi ra asamboefeyo rananimbo ai sümboyo-randeimb-ane. Ḳga asu fi ranai yanggirambofe tükefeyo ranai ana

sümbokoateyo-randeimb-ane. ⁴³Fi asamboefeyo ranana wosihoafori himboyowohü hoafendiyowohane. Iᅇga asu fi yanggiri botefeyo ranana moani aboedi himboyowohü ᅇginindi tüküfeihane. ⁴⁴Fi asamboefeyo ranana hifi ndanihündambo fi yanggir-ane. Iᅇga asu fi botefeyo ranana sünambeahindi fi-ane.

Hifi ndanihündambo fi-poanimboane, asu sünambeahindi fi-poanimboane rehayamboane aniᅇgo. ⁴⁵Sapo Godindi hoafi yare hoafiyowohü yahoya, ‘Weaᅇgurühididi nindou, ahandi ndüri Adam ana, nindou yanggiri niᅇgombo tükümeᅇfiyu,’ meho. Iᅇga asu ᅇgorü Adam, Kraiᅇ, aiana yanggiri niᅇgombo yifiafi saimboyu tükümeᅇfiyu. ⁴⁶Yifiafi hoearambe fi ranai moai raboatei tüküfeyo, ᅇga wani. Iᅇga hifi ndanihündambo fi raniboatei tüküfeyoane, asu süᅇgunambo yifiafi fi ranai tükümeᅇfeyo. ⁴⁷Weaᅇgurühididi Adam aiana hifihündiyu tükümeᅇfiyu. Iᅇga asu süᅇgudididi Adam ana sünambeahindi tükümeᅇfiyu-ani. ⁴⁸Hifi ndanihündambo nindou ana sapo nindou hifinambo nafiyumbihündi-mayu nahurai-anei. Iᅇga asu nindou sünambeahindi aiana sapo nindou sünambeahindi tükümeᅇfiyu nahurai-anei. ⁴⁹Hapondani ana sihiri nindou hifinambo nafiyumbi-mayu ranahandi fi-hoeari-yefomboanefi, ᅇga mare yahurai-animbo sihiri nindou sünambeahindi tükümeᅇfiyu rahurai fi-hoeari-ndemboyefi.

⁵⁰Wandafi mami, hoafi nda ndahurai-mayowamboanahi hoafehandüri. Nindou hifi ndanihündambo safi hori rani-finambo tüküfimbü nindou ranai ana ᅇgiri God ᅇginindi hifandarandi ranambe ᅇgu. Asu nine-moatükuni sümboyo-randeimbü ra asu ᅇgiri nine-moatükuni sümbokoateyo-randeimbü ra ndemündu. ⁵¹⁻⁵²Dibo hoafi meᅇgoro nda himborindei, nindou muᅇguambo sihiri ᅇgiri yifindefi. Iᅇga muᅇguambo sihiri ᅇgorü-süᅇgundahundühi animbo rani-poanimbo findefi hohu tükündahumboyefi. Nimehünou, himboari dikirihu afarihumindefi nou bidifiranambo fufuᅇ ai hoafindoani simbori tükündahumboyefi. Sünambeahindi fufuᅇ ranai hoafindoani animbo nindou yifiyeimbihündi ranai asükaindei botindahimboyei, asu muᅇguambo sihiri moani rani-poanimbo tükündahumboyefi. ⁵³Sümboyo-randeimbü fi ranana ᅇgorü-poanimbo findo haya sümboyokoate-randeimbü tükümbifeyo-wamboane. Iᅇga asu yifiyo-randeimbü fi rananimbo ᅇgorü-poanimbo findo haya yifiyo-rakoate tükümbifeyo-wamboane. ⁵⁴Ranimbo sümboyo-randeimbü fi ranai sümboyo-rakoate findoani, asu yifiyo-randeimbü fi ranai yifiyo-rakoate findoan-animbo, asu Baiborambeahindi hoafi ranai anihondü tükündifemboe. Ai yahoya, “Yifi ai awarihoeihü yanggiri koadürümbo niᅇgombo ranai harihoai tükümeᅇfeyo!” meho.

⁵⁵“Yifi se, naha sihafi harihefembo ᅇgininda?

Yifi se, naha sihafi ᅇginindi moaruwaimbofe ramboa?”

⁵⁶Moaruwai hohoanimo, ra yifindi moaruwaimbofe ᅇginindi nimindühane. Ahinümbi hohoanimo ra nindou-yafe moaruwai

hohoanimo nafuiyo arandi rananimbo asu nindou ai moaruwaimbo-ndahimboyei. ⁵⁷Sihefi Adükari Sisas Kraisindi nginindinamboyu God ai sihefimbo ramareamuna yifiar-ambeahindi hamarihehundi. Iga ranimbo-hündambo-animbo sihiri Godimbo hihifindihurimboane!

⁵⁸Wandafi mami, ranimboane se akidou-amboani bübürindeimboyei, nga se moani nginindi hamindi niboadei. Se muṅguambo si ahora Adükarindi ratüpuri tijirifondei ndühündi, nimboe sapo ndani-moatükuni nda se fifirihindi. Se Adükarimbo ratüpurayei ra ngiri moanimbondifeyo.

Godindi nendi fehefembo kaki

16 ¹Hapondani kaki Godindi nendi Sudia hifihü amarei ranaheimbo fehefe-ndürimbohünda gugurifembo hoafinda samboanahi. Kraisindi nendi Garesia hifihü amarei aheimbo hoafimayahi nou se-amboani rasüṅgundihindi. ²Muṅguambo Sande aho rananimbo nindou muṅguambo mamami se kaki masahümündi ranahandi saimbo sihei worambe bidifiri digehindi. Rananimbo süṅgunambo ro tükündaheandani, aheimbo kaki gugurife segudürimbo ra se ngiri afuri kokopondühündi. ³Ranihü ro tükündaheandüh-animbo nindou se dibonimehüpuri ranai sihei-mayo kaki gugurimarihindi ra sowandümo houmbo koandiheheapura wandi-mayo ahamundi fimbo pas kameihi Serusarem ngoafinambo mbihanimo-ndamboane. ⁴Iga asu ro-amboa hohoanimo-yahaniwani ahanihi ana, nindou ranimemo ranai ro-dibo mbikosomo-ndamboane.

Porindi hohoanimo

⁵Awi ro Masedonia hifi mbusümo nafindahe hehea siheimbo sowahi tükündaheamboyahi, nga ro Masedonia hifinafi homboanahi hohoanimoayahi. ⁶Awi ro moai fifiriheandi, nga se-babidi akidou nimboahani ngisihari tükefeyo ra aboedindoani maṅgahiyo, nüṅgumandahe. Se-babidi nimboa mbundiha asu ro nini-nafiyo hombo hohoanimoarandiri rananimbo se wambo nafi hombo mbifarihehindir-amboane. ⁷Roana se-babidimbo akidou yangiri nimarimbo ana moeisahi. Iga awi roana se-babidi gedühi niṅgomboanahi hohoanimoayahi, Adükari ai rawoyafo ehu ana. ⁸Iga awi roana, Efesus ngoafihü ndanihü nimandihani Suda-yafe adükari si Pendikos^a ra tükündifeyoan-animbo ndamboyahi. ⁹Nimboe sapo God ai nimorehi nindowenihi afindi aheimbo ahandi nindoumbofe tüküfembohünda wambo fondi masendimbo wambo. Iga asu nindou afindi ai wambo ndanihü hürütarihündiri.

¹⁰Iga asu Timoti ai rühi sihei nafindüfiyuani wani, se ndahorimindei worinindihoran-animbo ai se-babidi aboedi

^a **16:8** Pendikos ai Suda-yafe adükari si nübürambeahindi sesi yimuṅgu-remindimbo si-ane.

yihimbokoate mbinüŋguwamboane. Ŋga ai-amboani mare ro raweheandi nou Adükarindi ratüpuriyu-randeimb-ani. ¹¹Ŋga asu nindou ŋgorü ai ahambo yowani moanindi nindou-ani mbüsümbui. Ŋga se ahambo moani aboedi fandihehorani ŋgusüfoambe afure küre haya mbüsünüwamboane. Ŋga ai wandafi mami bidifiri babidimbo mbisinimonda sahehea himboyaha-purühanahi.

¹²Haponda wandafi Aporosindi hoaf-ane siheimbo hoafayahi nda: Ro ahambo wandafi mami bidifiri-babidi siheimbo süni hoeimbireandüri sahehea hoafiya-handowohanahi. Ŋga ai hombo moei yahumboani, awi hapondanambe ana. Ŋga awi ai ninisimboaniyo hombo nafi engoro ana, ai ŋgumbui.

Bidifiranambo hoafi

¹³Se hibadihündühi anihondümbofe hohoanimo ŋginindi kikihindühümündi nimboei. Se yihimbokoate moani ŋginindi nimboei. ¹⁴Se ratüpurindeihi ra sihei ŋgusüfo pefe hohoanimo ranambo yanŋgir-animbo ratüpurindei ŋgei.

¹⁵⁻¹⁶Wandafi mami, sapo se Stefanas asu ahandi worambeahindi-yei hoafi ra fifirihindi. Sapo ai boateiyeyi Akaia hifihü Kraisimbo anihondümbo-rihindeimbi tükümehind. Ai Godindi nendi ranaheimbo fehefendürimbo ratüpurü ra refembo afindi hohoanimoyei arihündi. Wandafi mami, ro haponda siheimbo hüti-hoafayahandüri se-amboani yahurai nindou-yomondi hoarehi nimboei. Asu nindou düdi ai-babidi farihoundürihi houmbo ratüpuriyomo arundi amboani kameihi.

¹⁷Stefanas, Fortunatus asu Akaikus ai sihei fondihümbo sapo se ndanihü sifokoate-mayeyi ranimbo asu ai wambo sowana masifomondamboanahi hihifi-hihifayahi. ¹⁸Aiyomo wambo wandi ŋgusüfoambe ndoru kümarundiri sapo siheimbo ramarundüri nou. Nindou yahuraimbo-animbo nindou aboed-anemo mbisefi hohoanimo-ndefomboane.

¹⁹Esia hifambe Kraisindi nendi amarei ranai siheimbo hihifarihündüri. Akwira, Prisira-anafe, asu Kraisindi nendi ahafe worambe fandihi nimarei arihündi ranai-amboani Adükarindi ndürinambo siheimbo hihifarihündüri. ²⁰Asu wandafi mami muŋgu ndanihündambo amboani siheimbo hihifarihündüri. Se Kristeni-yafe hohoanimo süngu simbori wakikihürindei.

²¹Ro Por-anahi wandi warinambo siheimbo hihifi hoafi nda sürü paparihandi.

²²Nindou düdi ai Adükarimbo aboedi hohoanimo-yondokoate-ayu ana, ai moaruwaimbo-mbifiyuwamboane. Adükari, se mborai!

²³Adükari Sisas ai ana siheimbo moani hipoambo-mbireandür-amboane. ²⁴Muŋguambo se Sisas Krais-babidi animboei siheimbo ro ŋgusüfo parariheandüri.